



善化縣志

卷之二十三  
人物一

卷之二十四  
人物二

ル 5  
3260  
14





凡 5  
3269  
14

昭和十七年  
十月十八日



善化縣志卷之二十三

人物一

人靈於物楚寶非珩以物方人瑚璉成器善邑地處潭州湘  
嶽鍾靈代多英彥益以晦菴南軒西山諸大儒倡明正學薰  
德而善良者固在一時聞風而興起者尤在百世善善從長  
如德業文章炳耀一時者自足增輝乘簡卽一行有關大節  
一事有利生民吉羽片光不能任其湮沒非誇維楚多材亦  
欲使觀感者得所景從也志人物



宋

王玠斬黃鎮撫使孔彥舟叛玠開陳百端不聽玠罵逆賊憾不磔汝舟怒併玠家屬沈之龍眠磯

尹穀字耕叟號務實剛直莊厲士林憚之詞賦典雅登進士第知崇陽縣廉正有聲晚入李廷芝幕擢守衡州至潭城受兵帥臣李芾聘爲參謀時城中壯士皆入衛臨安芾糾率兵丁獎勵忠義三月城不下援兵不至穀知城危與妻子訣曰吾受國恩典方州義不可屈若輩當從吾死耳召弟岳秀奉母出乃爲二子招鄉人行冠禮鄉人曰此何時尙行此迂闊事穀曰正欲令兒曹冠帶見先人於地下耳已乃積薪扃戶朝服望闕拜畢縱火自焚鄰人於烈焰中遙見穀正冠危

坐一門少長皆死芾聞命酒醉曰務實眞男子先我就義矣城陷多感奮死義者

趙淮丞相葵之子也李全之亂累立戰功德祐中戍銀樹壩兵敗爲元人所執至瓜州元帥阿朮使招李廷芝淮陽諾至揚州城下大呼曰廷芝男子死耳毋降也阿朮怒殺之凌登龍字顯夫嘉定丙子郡貢生以詞賦冠鄉選已卯再舉禮部退而結廬松坡門下受業者百餘人計使趙汝讜聞其名延直嶽麓累舉授祁陽令以疾辭以子炳炎階員外郎封奉議郎晉承議郎卒於景定庚申葬石塘金牌嶺子二斯忠鄉貢進士炳炎朝散郎

明



王忠信當世亂保障鄉閭民賴全活明初授鎮撫洪武閒率兵取蘇州以身殉

黃興輔字純仁號岳山品行卓越學業優長當事以名上太祖召見與語奇之授陝西道監察御史有聲

張啟洪武丙子鄉薦入太學授吏部主事以勤能著陞郎中操行愈慎官至浙江布政使崇祀鄉賢

謝京一性豪邁藝勇過人永樂十四年征夷將軍朱能聘入幕府從討交趾與士卒共甘苦屢建奇勳授雲南洱海道卓著政聲

黃以誠居身純謹嗜古善書伯兄以敬爲靖難事獲罪謫戍甯夏誠罄家財遺之生平好施精醫術多活人

黃寶字廷用興輔曾孫成化進士歷吏部郎典選事公慎廉明有黃寶不愛寶之謠遷太常卿擢都御史巡撫陝西時潼關大饑城堡多圯羽檄旁午寶肅紀律清壁壘豫餽餉達烽燧恤災沴屏黠猾策防邊患秦地賴以甯逆瑾柄國罷歸瑾敗復起巡撫山東移疾歸著有東崗集賜祭葬祀鄉賢曾宗正號麓峯成化丁酉舉人曾理之子幼孤事母孝舉正德庚午鄉試判大名府理河政漕運無悞以母老乞歸鄧昌成化鄉魁父審嘗爲令昌仰承家學早負才名令富順清賦賑災興教勸學陞劍州守歸以詩書課子孫當事表其坊曰光啟

王聰字達之正德丙子鄉薦授上蔡令調賀縣時嶺寇爲



民害聰計殲之以功陞廣平判晉太平同知著鶴菴樵語

熊 字號軫峯正德丁丑進士授行人歷任松江府直指歸家手不釋卷工文翰墨刻十三經篆離騷里居見童幼必以禮求書者雖微賤必應之

曾 造嘉靖庚子舉人居鄉正直令萬安陞宿州守多善政士民感戴宦歸詩酒自娛以壽終

黃 模嘉靖丙午舉人任雲南通判動遵古誼不逐時趨曾拾遺金封識還其人析產多讓兄弟置族祭田百餘畝判雲南時沐府兵變人皆畏避模獨往諭旋定賢聲大著

鄧 巍嘉靖進士令溧水晉御史疏劾權貴忤旨受庭杖直聲大振奉命巡邊值俺答猖獗單騎行營登城禦寇出守保

定補鳳陽歲饑賑活數萬人致政家居舉大賓壽八十五

吳時慶事寡母孝平居純謹急人之阨不能婚葬者力爲周助嘉靖甲辰旱米價踴貴施米百石復煮粥救活千餘人遠近德之

張 應倜儻有智畧嘉靖末大洲流賊猖獗上官委捕賊平有功應賞不受隆慶初湘陰湖賊亂仍委防禦盡平諸賊不居功處鄉黨和厚温抑人咸重之

黃洽中模四子字景臺萬曆進士標格孤介初知歸安有聲厯戶部郎知太原南安二府所至畏其清嚴在太原奏蠲地畝荒稅二萬餘兩在南安蠲免木價五萬緡宦歸課諸子悉有文名政績詳江右袁州府志



胡耀字仲陽號一松讀書淹博挾策湖海交遊皆一時名士同郡張龍湖熊軫峯輩屢相贈和江陵張太岳公有贈一松歸長沙序

馮時聘篤行力學友愛性成家貧茹苦不受人憐所居數椽不蔽風雨弦誦不輟授書里中師律嚴明課讀循循有序以廩餼終子一第殉國人以爲忠孝詒謀云

李道炯才識警敏以孝友稱早食廩餼臺使每賓禮之由明經遷鹽亭教諭時奢酋蠢動盡力備禦士民安戢終遵義教授造士有風範

唐震歷官戶部侍郎勤廉公謹參議四川督建昌邊儲修城建堡土官馬勒賢爭地殺人暮夜以金賂卻退卒擒捕置

於法軍民樂業祠祀之以參政歸著東軒稿壽八十一

廖魁早孤年十四食餼通經史善吟詠任秀水訓導解職歸衡門棲息泊如也

劉俊府庠生任鳳陽畱守經歷直性正操愷然特立時藩府中貴校軍橫甚俊倡義執宗校辨論侃侃眾由是戢

姚一元任貴陽經歷有賢聲樂善好施家居二十餘年三舉鄉賓郡邑推重

李可植性樸學純里中奉爲經師萬曆乙卯舉人壬戌進士授溧水令調封邱兩與分校所取多成進士陞鳳陽知府周之麟府志作周之麒字伯良中天啟辛酉鄉試甘貧樂道一生不入公府侍父入都廷試中途父邁疾卒徒步扶櫬踵



破血枯至會城度不能生覓舊識舟載之奄奄殘喘猶朝夕  
撫棺痛悼抵家葬畢一夕卒

羅 黻號衡岳由例貢授鳳陽檢校崇禎七年擢天長知縣  
秩滿以養親辭歸分給兄弟財帛處鄉黨以謙和散財賑乏  
里有逋餉莫措者代償無難邑人稱之

潘可愛號澤山崇禎初恩選授博羅主簿歷任南甯知事轉  
授博羅永安縣篆監廠潯州咸有治績歸著潘子穎篇枕中  
吟行世

陽性初號翼江博學負才名孝事寡母友愛兄弟有司旌之  
由選貢任思南經歷有賢聲

吳道升號聚垣少負雋才至老嗜學不倦工古文詞所著有

管窺草見聞筆記易義臆解性孝友居喪哀毀盡禮兄弟友  
于不析筋太守羅旌其門曰孝友文章督學梁谿高公採其  
遺行載入三楚四朝文獻錄

吳道行字見可一號嶠山邑庠生幼聞父老談嶽麓先賢肅  
然傾聽指示忠義大節輒色喜被褐安貧畱心著述百家諸  
子兵餉軍政剖決利弊悉見施行主講惜陰書院學者稱嶠  
山先生獻賊犯長沙遁萬山中手訂嶽麓志縣志府志著有  
嶠山集易說讀史闕疑諸書祀鄉賢

吳 愉字去佛嶠山先生長子十齡餼郡庠崇禎歲貢居城  
南古渡又號古渡博識能文乙酉闖逆犯瀏太守周二南率  
眾堵禦去佛以參謀從行與賊遇戰於官渡被執不屈死附



祀蔡周二忠祠著有春雪堂參岷樓諸集

吳 愷字去慵一字損菴樓山先生季子與兄愉齊名明末以明經薦不就曾兩修郡志及嶽麓志屏居長松里澹然寡營問字屢常滿耄年吟咏自適著有古今日錄擬古樂府三異筆餘存園應草素履草亭雲錄懷霜錄諸集

吳甯訥字正言庠生痛父愉殉國難徒步號泣於炎天烈日中覓遺骸躬自舁歸葬訖哀毀不食人稱孝子

李安仁字紹唐世居醴陵坡母四十忽瞽仁每夜焚香禱祝三年母目復明家貧好施與見鄰里子弟城市遊輒動色相戒勉子孫十餘人咸成名有斐有聲其孫也卒年八十餘李守節忠樸仁孝詩書課子周濟貧乏里中多賴以生活公

賦首輸邑令每延商政務贈表正家邦扁額獎之

馮一第字根公天啟七年亞魁廉隅孝友以文學著與湘潭郭幼隗交摯同受知於蔡江門司李獻賊陷長沙一第走湘鄉乞師他所賊僞檄脇徵甚急書卻之作自弔文賊檄再至繫其母與兄脇之不得已就縛赴賊所誘降不屈罵不絕口乃斫其兩手截舌劓鼻置營中一夕死母兄獲免時年四十著有史發二十卷代古詩一卷賁閣吟譜二卷學者私諡曰介烈崇祀忠義祠

李承德由例授京職性孝友好義饑施粟寒施絮貧施棺當事引重年六十子孫繞膝親友稱觴畢即棄世子先登歲薦先香及世櫬先後舉於鄉



李世彬字青容承德孫補弟子員穎異豪邁技勇絕倫獻賊陷長沙沿鄉屠戮彬率家僕鄉勇殺賊多人力竭被縛磔之妻被執不屈賊砍其足墮崖死後家人裹二屍葬大屋灣陳獻惠明貢生天啟乙丑考取天下奇才賦性直遂見知於吉王督師何騰蛟聞名延訪時以母喪辭不赴以明經終皮振鷺邑廩生獻賊陷長沙招豪傑爲援振鷺與堂弟振毳逃避至謝家橋鷺爲游騎所獲誘脇不屈死全家被害毳竄山中得免

周生文字蓮峯少以才自負俯視儕輩惟長沙江有溶一見如舊遂以江爲畏友登崇禎丙子賢書一試禮闈不遇遂絕情上進恣意遠遊著九邊圖說晚年屏居嶽麓不復與人閒事子於敬字若思領鄉薦文名克繼其父云

黃學謙字又謙太守洽中長子以選拔任樂昌諭陞陝西興平知縣政尙清簡致仕歸別業照杯亭藏書甚富詩喜晉魏字法鍾王張賊檄立僞官被脇憤逃咏史見志三舉鄉賓以隱終

王家瑞字二徵京衛參軍之賓子賓以德行著郡人稱之瑞尙穉由選拔任定遠歷陞順甯守有聲致仕時長子都三子載一授楚雄同知一授新貴令

黃學和字二調好學力行由明經授瀏陽教諭課士以行誼爲先士林推重兩舉鄉賓學生二子鈞鈔親授經書壬辰鈔成進士甲午鈞領鄉薦以子貴贈吏部正郎



黃焜字叔闇號西墅豁達豪邁時有叔度之評天啟中以舉人領州牧會詔求直言焜上書數千言切中時弊御筆改名裳吉欽賜進士擢兵部員外郎陞密雲兵備道有治聲周識長沙衛人善化明經博洽沈潛蔣翟二公建惜陰書院徵爲院長講學外毫無干預入田百畝於書院助膏火周昌明少孤奮志讀書食餼府庠延名師集貧困子弟肄業於家多所成就時與野老課農桑酒酣輒哦詩自適曰吾以筆硯付子孫耳

蔣朝芳事兄愛敬睦族和鄰解紛濟困一生不至訟庭屢舉鄉飲不赴莊學士讚曰其貌樸其行篤其衷穆想而像之殆義皇以上人物

于宸父喪有繼母弟亡宸撫孤姪成立贍養弟婦以全其節庶母因哭子失明侍養殮葬俱盡職

趙應宿九歲失怙恃苦學通經史事庶母盡孝厚產歸其庶弟已甘貧乏囊稍贏餘卽周朋友妻易氏操作助之壽俱八十餘

簡大綱事母孝母卒年九十四孺慕號泣築室墓旁捐置義冢一區邑人名其地爲簡家坪

張維邑庠生少孤事祖母食膳豐潔自甘粗糲勉其弟力學有成業師有疾典衣療之里人有賣男備棺者與之棺而還其男著有湘水漁人集

李有斐字非文少英敏以孝友聞負文名精書法甲申左兵



屠戮斐挈家匿山中被執身中數槍夜恐痛負母走不十里母渴取水飲母復遇執被害

楊仕儒字魁字弟仕俊字觀三崇禎癸未獻賊陷長沙仕儒兄弟誓不辱於賊明年正月賊騎至東山市執仕儒兄弟劫之降俱不屈而死今市南楊古老山仕儒墓葬處也

黃浹中以貢選州同不仕恂謹狷潔好善樂施壽逾大耋石中琇勁直不阿時奉飭丈田豪猾舞弊縣令馮知其賢委之清弊戢奸官民兩利歲饑出穀三百五十石倡先賑濟縣令李獎其義令督城煮粥施藥全活甚眾

謝學書功苦力學代兄賠運糧餉數百金人稱孝友

胡用中長沙衛指揮弱冠以謹飭當上意約已輯眾屢著勳

猷儒雅不愧其先

于友忠性行端方孝親睦族道路橋梁多所修建因便民倉地險艱於輓運捐砌石路人咸賴之舉鄉正人皆感服

國朝

張懋卿懋祥明孝廉東暘之孫黔陽教諭吉王世子少師其政子也卿以明經知江西分宜縣祥由郡廩贈文林郎兄弟篤孝友尚氣節卿子上楚祥子全楚大楚完楚祥念卿一子孤更以大楚爲之嗣大楚列歲貢知時不可爲不樂仕進全楚字德昌廩生獻賊陷長沙舉家遠避全楚罵賊致命完楚以廩生中順治甲午舉人上楚康熙丙午副貢完官湖北石首教諭攝縣篆邑多風逋捐俸代償大楚子人宜人宗俱庠



生上楚子人傑庠生人憲長邑廩貢全楚子人卓完楚子人安人宏人宣均邑名諸生迄今子姓蕃滋科名蔚起稱湘西望族焉

黃 鈞字伯宣教諭學和子順天甲午舉人授華陽令有政聲傳家敦崇正學吏部文選司炎其孫也

周應遇號鶴泉歲貢生佐經畧洪承疇幕薦補雲南洱海僉事以清廉著任滿乞歸怡情山水兄弟友愛垂老未析筋著有水軒集

黃 鈞字仲宣學和季子順治壬辰進士授刑部主政選吏部員外郎丁酉典試河南所取士先後捷南宮者四十餘人李相國容齋其所拔也著有洞庭釣叟詩草

張大德幼穎異研通經史兼及星象韜鈴爲巡道趙祥星參謀經畧洪承疇知其名凡舉大政必與商決後趙撫黔滇仍偕往贊襄多善政後以親老辭歸

張 蘊性和平優經史 國初寇擾差繁官民兩賴尤樂行善事罔惜貲財至老好學不倦子孫科名繼起多人

張 茹字彙征歲貢生著作甚富授生徒多所成就生平不屑營家產視田所獲奉甘旨外悉以周貧乏以壽終子懿勳邑廩生懿績庠生孫淇本乾隆己卯科副榜任石門縣教諭鴻本廩貢生澍本恩貢生泗本潢本湘本潮本均邑庠生曾元尤蔚起焉

李先登號文岸獻賊陷長沙負母逃匿獲免母沒哀毀盡禮



垂老孺慕性敏嗜學詩古文詞俱佳屢試冠軍由崇禎歲貢授湘鄉教諭督師何騰蛟擢軍前監紀以養母辭歸 國初詔求山林隱逸偏撫金經畧洪徵聘俱不就家居教子弟扶進後學周烈王瓊輩咸出其門弟先香子世樞俱領鄉薦著大觀堂文集並選曲江文行世壽八十卒祀鄉賢

張文宏字偉濟號拙菴原籍黃州 國初由長沙守府歷陞廣東瓊州總戎府威惠並著有儒將風葬城南洪恩寺側子定邦遂隸善籍後起彬彬焉

劉邦彥字美生獻賊縛其父養和索馬將殺之時彥頭受重創裏傷救護妻黃氏泣隨求代賊爲感動釋去彥居喪三年不入寢室治家有法鄉里咸矜式焉

劉定基字子肇列弟子員工古文辭性澹泊不營家產怡情山水甲寅吳逆欲授以僞署遁跡僧寺平定後辛酉領歲薦授徒終身

郭嘉言家素封值連年旱荒言架席棚煮粥賑饑存活無算時檄催逋賦甚迫嘉言出一萬六千金代爲完納逋戶多齎田券授之言悉還其田有巨盜行劫罄所蓄欲殺之家僮興福興忠興德興耕正金正貴學訓曰吾主善人也爭先代死盜俱殺之言得釋其故宅九都大屋塲今建祠

胡夢容長沙衛千戶癸未避亂居鄉力行善事荒煮糜粥路設茶湯施藥施棺鄉人德之

蕭 斐庠生襁褓母沒當戎馬後斐外給徭役內事兩繼母



施棺掩骸建梁修路率傾囊助之

周世岐字西人賦性剛直遇義敢爲滇南叛時大兵過境差費蠶出人心皇然世岐冒鋒刃陳明蠲免承平時清丈田畝釐剔弊端增定學額邑人皆得其力且精岐黃業活人無數壽八十一以布衣終子孫入庠貢成均多人

劉啟第字文先秉性剛方地方利病興革捐貲不吝國初雜費繁興呈請剔除四境安堵焉

王起鳳字克生性慷慨有借貸難償者置不問康熙間連歲饑荒減糶濟人施粥發賑迄今子孫科名稱盛

易清灝字雲衢剛毅有膽識吳逆之叛徭役頻仍族眾多棄產避之清灝獨守先人廬墓逆伏誅族眾得所依歸皆賴其

力焉

李先香字澹聞康熙癸卯舉人性孝友任建昌令政簡刑清催科不擾祀名宦著有萃草紀遊曲江吟集

黃夢鶴字九皋修行立德垂老始得一官由歲貢任東安訓導應院試趙恭毅閱卷歎曰宿儒也旋題請南北分選教缺疏通自此始

劉永貴雲南人康熙辛卯武舉入籍善化官漳州時捐立義學陞遵義副將給兵民寡婦貧而守節者以銀米署貴提捐俸修橋渡積米穀未仕時有鄰人家貧婦家欲以女別字貴捐囊完娶在興化有將女抵債者貴訪得其實代償之

郭金門字黃瞻父嘉言慷慨好施家無餘財金門寒苦力學



工詩文康熙甲子鄉薦爲榮河令上司檄派運米民不堪命太守責之甚急金門持之堅卒得免乞休歸杜門不通請謁後奉文均糧善邑例當減則邑侯抑不以聞金門直謁撫軍陳請閤邑賴之爲嶽麓山長名宿多出其門著有易解參同契補註詩古文集

周應運髻齡入庠尚氣節不隨世俯仰杜門著述引誘後輩多所成就年七十猶篝燈夜讀著有滿園集及集陶詩句李 焜字旭菴廩生文名藉甚交城孫邑侯聘同李有藻修縣志學豐遇齋以明經終

趙又昂字復日邑明經幼貧苦其父遣學醫不從乃日潛於荒山破屋席地讀書晨出夕歸其母知之呼歸就塾博通經

史著述甚富康熙間邑令孫謙延修縣志

熊 超字班若天姿敏妙十三補弟子員弱冠遊京師以國學中康熙庚午亞魁與同邑李文炤邵陽王元復甯鄉張鳴珂講學不倦尤邃於易著有三樂堂文集

黃夢弼字右星庠生遭亂避瀏山中負米養親屢瀕於危猶手一編不輟性剛直面折人過訓勵子姪篤重根本子文憲中鄂闈鄉試科名踵接

皮 旭字草聖善屬文家居澗泉日耽詩酒所著有山糊塗亦齋集欲從集梅花百韻四聲全部嶧庵詞曲諸稿

黃象坤字至元八歲通經入庠旋食餼開府傅中丞韓奇其才薦贊親藩軍務不就著有詩文學步



李承芳字譽軒由太學生歷任兩浙鹽運使崇祀浙江名宦居鄉好施與津渡橋梁捐修不愆

李有藻字蓋梅號琮谷母病篤焚香告天願以身代母沒數日不食好讀書工草楷爲名諸生性友愛篤交誼督學特舉優行著有梅花百詠聚奎樓集禮經纂註續纂邑志

李明恭字恪人邑庠生鄉賢元朗之父也嘗傾家貲爲族人完賦治家一遵古禮喪祭不用浮屠里人多效之好讀書晚年猶手錄程氏易傳示子姪曰內聖外王之道盡在是書何以多爲

張之勳字濟常庠生性肫摯一妹適李氏夫婦早亡家道零落其子女爲之婚嫁尤篤宗誼差徭一身經理每捐囊弗計也家居授徒多所成就子孫科名皆以一經相傳  
黃夢日字旭海早食餼嚴氣正性卓然物表子文開文簡文閣皆世其業孫玉汝登賢書

黃夢齡字松年邑貢生階古力學長於詩工作書著有松園集士林仰之

李世樞字蔚雯康熙己酉舉人世居曲潭舊立曲江文社督課子孫手不釋卷居家以勤儉恭恕爲本當軍需煩劇代理差徭保全一鄉後裔振振克世其家

李逢清字天一世樞長子十五補弟子員試輒冠軍事嫡母黃氏盡孝養母病裹衣侍寢調視湯藥母沒哀毀茹素三年著有芸軒集子紹衣登乙卯賢書



黃賜緋庠生華陽令鈞子也事親孝與弟開虞姪文選皆有  
文名友愛至老不衰子孫遊庠食餼者三十餘人

裴正時康熙庚辰進士任信宜令革私派緩催科均添鹽利  
置膳士田士民樹碣頌之粵饑總憲趙恭毅奉文賑救特委  
任焉較斗斛設粥飯多所全活

黃夢星號靜齋興平令學謙之孫謙著述富兵燹後大半散  
佚星挾筆札收拾於各處肆館中哀輯成帙家居恂恂孝友  
年八十無一字入公庭後嗣列宮牆鄉薦者多人

李逢澡字浴仙好義通財由明經任巴陵訓導陞沅江教諭  
培植學校士風丕振年六十九卒於官

李天柱字石峯立品端介康熙己卯鄉薦任東流聽斷明決

約吏有法造士有方陞信陽州因公解任宦橐蕭然祀東流  
名宦兩爲嶽麓山長多所成就

楊先芬字儀山歲貢授桂陽教諭訓士一以純樸任滿辭歸  
事母十餘年無忝色養居心忠厚好施與人皆善之

皮仍馥字卉仙孤貧力學值亂離授徒養母憐兄于煥弟仍  
辭窘乏割己產與之子弁字如星撫孤姪如己子田產與姪  
十之六鄉居力敦古道以明經老

吳甯諮字采夫舉康熙戊子孝廉授安遠令政務平恕改恩  
施教諭地屬苗疆士習鄙陋諮教導有方俗化彬彬父亡事  
嫡庶二母克盡孝養年七十卒

黃夢旒字占收號造齋年十五遊鄉校嗜古文詞研心字學



聲音黠畫考核必詳爲江谷尙先生器重作造齋賦勉之  
李逢茂號畔松七歲失怙受母訓弱冠補諸生營畔松別墅  
課讀不倦長子紹宗號迴溪由歲貢任衡山學博著有迴溪  
文草次子紹龍庠生三子紹易字經原沈靜端介早食餼工  
詩五子紹憲邑庠六子紹富舉人八子紹嵩州目生七月母  
故孝奉繼母至老不衰孫曾多列黌序

李文炤字元朗號朗軒生而岐嶷有異慧經書過目成誦十  
八爲諸生康熙癸巳領鄉薦與邵陽王元復甯鄉張鳴珂切  
劘講學於六經傳註程朱緒言旁及輿圖象緯內經參同契  
諸書析疑辨難多所發明學術純正所著恆齋文集諸書多  
採入 四庫館鄉先生經學之深船山而後鮮有能及者嘗

爲嶽麓山長授穀城教諭祀鄉賢

韓澤遠字滋樹歲貢生敦本行重氣節涉獵經史子五長楷  
自有傳次棠歲貢生慷慨好義士林稱善次樂次植樂子之  
煒俱別有傳

黃夢熊字太占節婦劉氏子庠生立品端方纂修譜牒倡立  
宗祠置祭田十餘畝克篤宗誼

韓楷字錦江號皆木甫成童補弟子員旋食餼舉於鄉康熙  
熙戊戌進士主政吏部性孝通籍後卽以親老陳情乞假南  
歸不與當軸通謁博覽經史著有隱谷堂文集  
張啟洛字則書歲貢司訓耒陽初蒞任以學宮向不利科名  
捐貲改建是年卽有領鄉薦者分學租助生徒膏火著爲例



耒陽士子爲立主祀之子之綱孫如韓俱入庠

張聖羽字儀吉爲文淵博宏肆與同邑李朗軒先生講求經學教授生徒功課不少假借郭昆甫李經原輩皆出其門由歲貢選南山學博滿任告歸

劉世澍號霽亭邦彥之孫八歲能詩十歲作海棠賦遂知名康熙庚子領湖廣鄉薦乾隆丙辰試鴻博司農新安呂公宗伯桐城方公皆首薦之乙丑選沙河令廉直不阿邑故幾輔孔道民苦驛差澍一切革除讞疑獄伸冤抑任滿請於上臺改衡山教諭得遂讀書初志著有聚桂山莊詩文集楚辭補註讀詩心得古學要覽四書講義會歸古文詩選等集子三長若鶚號一峯庠生若鵬號亦山乾隆己卯舉人任安溪魯

山令有善政擢同知若鵬子夢元廩生若鶚孫之蘭增生

韓樂號適齋八歲能文章解聲律讀書自立程限補諸生學使繆公湘芷奇其文曰是當張楚南轍者康熙庚子中副車益肆志經史絕意仕進工古文詞詩宗義山客遊江左與理質儲公罕皆王公爲道誼交館穀所入分給諸弟絕炊弗計也著有尋樂堂文集

方如琬字達夫康熙庚子舉人雍正癸丑以明通榜歷任四川金堂仁壽知縣居官勤恪自署堂聯云祿薄儉常足官卑清自尊上游多器重之祖鳳祥邑庠父盛時明經胞弟如琮歲貢選會同訓導經學淵源

黃文憲字千頃雍正癸卯舉人幼穎敏孝友端方一介不苟



力學工詩文授徒多所造就

張汝治字台三雍正癸卯舉人仕終湖北長陽教諭長陽士習囂凌治嚴訓飭勤開諭士習一變爲學使所器重以爲真人師也

李芳春字芬山品高學贍素負文名歲貢生七十三歲始登甲辰賢書一生詩文之外惟棋酒自娛

黃文揆字位伯氣度豪爽學行方正雍正甲辰舉於鄉手不釋卷談史事口如懸河著有存墅纂言先儒精華錄

黃開虞廩生博通今古子三長文化增生行誼篤實家教嚴整次文選雍正甲辰副榜學問該博制藝渾灑三文英邑廩生精史學歲荒贖范氏鬻女散穀三百石以周貧乏督學獎

以優行貢成均院憲趙給敦本務實扁額文化孫士榮乾隆乙卯副榜至今孫曾列仕版者多人

李芳華雍正己酉舉人以東脩供親甘旨務得歡心以孝稱學以宋儒爲宗著有四書詳說綱目集義讀杜詩解澹園文集藁澹齋文集

黃文治字大猷歲貢生品行端嚴精研周易傳義子五長炎丁未進士次瑀辛酉舉人選浙江石門令次琦次彰次秀俱庠生

李聞知雍正己酉舉人東流令天柱子家學淵源手裁峻潔選平江諭不就子三長道一別有傳次道顯庠生著有律呂纂編道甯舉人與人交直諒任俠有託妻孥遠遊者爲之經



理衣食耗費數百金邑令某聞其賢屏騶從數至其家卽有挾多金託干謁者正色拒之選會同諭不就子閣鳳庠生黃文驪字北野廩貢生母病侍湯藥衣不解帶待人天真無僞守正不阿子玉鬯玉履玉潤俱列庠孫曾拾芹者多人壽八十六

韓 樞字維斗歲貢生情性敦樸學問淵邃詩文亦卓然名家士子多取正焉

張如璋字世瞻攻苦力學不求聞達不苟嘖笑待諸弟姪甚嚴財用相推謙抑真誠爲人信服以子汝潤封奉直大夫黃文簡字敬之優廩生博極羣書試輒高等每星月澄明登山仰視星象言水旱厲疫多驗兄文開弟文閣皆諸生有行

誼子玉汝登賢書斑庠生工書法

高 烈字紹文號南岑性介直李元朗鄉先生最器重之

羅文連郡庠生性質粹美家素豐多善舉子四輝陶庠生輝楚輝潭俱貢生孫琦辛酉進士輝志子其長孫也

黃文政字以德國學生性友愛析箸後弟病噎竭力醫治弟沒代爲償債人稱其賢壽逾七十

黃文典字先謨父沒廬墓三年家貲少餘卽以濟貧乏三子俱列庠有文名季玉衡成進士

熊 沅字示三廩生少失怙事母孝性剛正邑侯魏星園重其學行延主教讀榕門陳大中丞聘同纂修通志子元善優廩生精於易詩品清新潔已自愛粹善庠生



黃 榕字道和號石村黃瑋同懷兄弟雍正丙午乙卯先後領鄉薦精史學著學庸心解受業王運樞爲付劄劄焉

韓 植號宋夫吏部楷副貢樂之同母弟幼稟庭訓力於學與伯兄楷仲兄模叔兄棠暨樂先後蜚聲庠序累葉書香

楊惠生樸訥勤儉雍正五年歲歉廩粟千餘石減市價三之一以恤貧民其他助婚葬成橋梁設渡船皆慨然身任中丞布蘭泰賜書杖獎之

黃 炎字勿磷號淵亭雍正丁未進士由庶吉士改吏部郎中山西正主考雲南永北同知童子時從父受經問晦翁何人輒欣然有向往之意讀論語傳註四閱月遽掩卷曰自是不用講章矣通籍後遊京師與方望溪先生相契結望溪書

朱子不求人知而求天知不求同俗而求同理句贈之炎佩服終身罷官歸林局戶安禪惟太守呂南村叩門始一出見南村望溪故人也

張汝潤字栗夫號漱渠性情和介各經註疏皆有訂本中雍正乙卯省元乾隆丙辰進士官刑部斷獄多所平反轉吏部郎中人稱金玉君子訓子弟每以士先器識爲諄諄子雋思敏思歲貢生亶思庠生孫先翼庠生

韓之煒副貢樂之子賦性明敏早歲補諸生旋食餼學使葉公奇其文登乾隆癸酉優貢

萬 機字品山號南邨歲貢生著有史評畧補經滄甯王九溪觀察謝梅莊諸先生評定所論多有卓識機父世法號止



齋為諸生四十年恆潛心史學機蓋得力於庭訓云

黃文翰字芸閣邑庠生文思敏妙書法顏柳善體父志事庶母盡孝壽八十

張文封字次康學有淵源篤孝友修祠宇續譜牒皆身任之子士第孫承蓋俱鄉舉

黃文藻字詞臣早食餼為弟姪輩經師子玉豐玉師孫思孝皆列庠豐負性剛直論事侃侃思孝豐第三子邑庠生平讀書於倫常用間逐處體認嘗曰窮理之法在行不在言授

徒多所成就進士張書田鄭勸卿皆出其門子友愈庠生張如英庠生師事鄉賢李朗軒好讀宋五子書治喪不用浮屠嚴峻丰裁令人敬畏

屠嚴峻丰裁令人敬畏

余鳳舞庠生先世為長沙衛曾祖樸玉祖衷恆父惟謙皆列

邑庠舞少失怙恃性嚴正壽八十四子振翼增生善事父與繼母孫嘉集庠生

唐文華字宗舜由歲貢授甯遠訓導品潔行修與鄉賢李朗軒相友善學務為己生平著述如孝經小學楚辭補注皆能

會通諸說以折其衷子開性開思皆庠生

俞純粹字又范庠生事親以孝撫幼弟成立差徭獨任建宗祠捐祀田二十畝雍正五年施穀三百餘石乾隆甲子捐賑

荒穀四百石又修獨木橋沿岡橋費千餘金脫粟布衣片諾不苟太守馬金門表為端方正直壽九十

黃文思字兼四增生為文一宗理法手纂類編一書典核詳



明子玉韞國學生睦族和鄰處兄弟尤厚自少至老友愛無閒言

黃文起字復韓明經友愛諸弟歲荒施粥通衢捐穀百餘石做常平發之

黃文易字宗義胞兄業早逝遺孤甫四月易事嫂甚敬經理其家及孤姪成立出所儲五百金穀入百石同族交給曰今而後可無媿吾兄所託矣囊橐一空灑如也

文尙宜多財善施雍正丁未穀貴照常平減價散賣鄰有出妻償債者解囊贖之

黃澍綸字沛宇號笠潭早歲入庠中雍正乙卯鄉舉乾隆丁巳會試以明通榜授靖州學正己未進士以庶吉士散館授

安徽繁昌知縣清謹自勵一官蕭然解組歸著述自娛人稱有叔度風

李紹衣字光祀雍正乙卯舉人乾隆乙酉 欽賜國子監學正於 學宮及邑乘諸公務效力良多

黃玉汝字麗山弱冠能文雍正乙卯舉人授山東泗水知縣值蝗起親率丁役掩捕兩旬盡殄以怔忡改安福教諭時金川用兵禮當孔道佐治軍儲當事賴之

黃玉淵字或菴負性磊落壯遊鄉校精研宋五子書疑義獨關身體力行立功過格以自警一時名雋多出其門

皮殿選字策丹乾隆丙辰舉人已未進士官直隸滿城縣令修節孝祠查復張寄園賓興田爲士子鄉試費又清復方順



橋地畝爲書院膏火資增畱養局及義倉事詳滿城縣志子志遠庠生志尙列賢書孫學海副車志遠子司鐸保靖保邑民苗雜處海稟學憲請照三廳例增苗學一名苗民感化黃必達號照乘歲貢生行誼敦篤季弟南亭成進士皆達教讀之力晚年選學博不就以著述自娛

杜迪功字敘九乾隆丙辰舉人選浙江麗水縣令在任九年興利除弊士民感戴頌爲神明

黃玉衡字象斗乾隆己未進士歷宰江南宜興山西和順有政聲庚午與分校稱得人方伯徐芳圃所拔士也捐俸刻儲六雅遺文士類多所培植行詳程尙書傳及和順縣志子士茂領鄉薦宰安平

孫良貴字鄰初號麓門乾隆戊午舉人己未進士官常德教授擢甘肅安化知縣權慶陽府知府博聞強記足迹半天下所著考古質疑六十九篇楚南水考十六條及黃河源考皆疏剔確鑿詩句雄渾有麓門文續二卷及墨樵詩鈔四卷子立本歲貢生

汪啟緒號德圃父煜雍正己酉經魁緒少孤力學登乙酉科鄉選歷任江西信豐瀘溪實授峽江卒於官士民輓詩有恆以慈心懷赤子並無官面對黎元之句

黃玉輅字桂亭淹貫經史弱冠與伯兄照乘同補弟子員旋食餼試輒冠軍屢薦棘闈不售以孫友召贈朝議大夫言世濟字大經庠生講求實踐親歿廬墓三年歲饑爲食待



餓者活甚眾晚年猶勤制藝資以教人年七十四肅衣冠端坐而逝

熊祖熊字幼繹號闇夫乾隆戊午舉人歷官廣西靈川知縣永康州知州著有二宜堂詩稿

郭煥字昆甫別號羅洋山人博極羣書爲文雄深雅健雍正乙卯選拔入成均每試輒首選祭酒以下皆驚爲異才文章氣節動以古人自期宗伯方靈臯雅意推重欲致見不可其矜尚名節類此乾隆甲子中本省鄉試第一以學行薦授國子監學錄陞助教卒於京年四十著有羅洋文草古今體詩文集行世山人軼事甚多流風餘韻久而不泯曾孫祖翼廩生自有傳

張如日號澹溪乾隆辛酉選拔丁卯鄉舉幼有疾啟戶面山終日靜對經年疾愈而學亦進考拔時倣依入號學使倪公心異之及闕卷遂入首選赴春闈不第由明通榜選教諭著有澹溪文稿

李紹富字以鄰乾隆壬申經魁歷任山東長清壽張恩縣保舉卓異陞水利同知以病假歸士民呈請入祠祀之

郭燦字仲甫乾隆癸酉選拔與兄煥齊名擢廣東曲江令多善政捐修九重臺風度亭諸名蹟莅任三年民立生祠祀之修本境郭家橋費千金至今利賴子孫多列膠庠

李道一號南臯乾隆癸酉選拔任永興教諭性古澹不妄與人交著有南臯文集



黃玉詔字鳳銜早食餼爲文力追前輩乾隆癸酉領鄉薦挑發廣東任羅定州同知手輯歷朝名臣奏議古今文待梓黃裳字在中明經品行方正陶冶後學各因其材遺稿惜多散佚子孫克世其家

凌瑩自幼失怙母張氏延師教讀由明經選安福訓導聚徒授學作育有聲

蕭履謙性平澹冲雅居長郡幕三年辦重案詳慎炳燭盟心子大經己酉舉人大本辛酉選拔俱任縣令就養官署疾篤與妻甯氏訣日後十日當與汝偕決旬妻卒孫伯鸞仲翔皆庠生

黃璵字惟負號培遠邑庠生喜施與鄰族貧乏者多賴以全活子孝陔孝鎰俱食餼孫曾貢成均列庠序者多人夫婦壽逾大耋閭里榮之

張九思字聿修號竹軒別號洞井山人乾隆庚午優貢任甯遠教諭端方嚴肅屏絕聲華與畊南羅洋麓門諸名宿以道義文章相切劘所作蒙泉草堂記夏醴谷學使稱之以爲古楊子雲不是過書法瘦勁雖平常起草無苟筆所著有火餘集時文蒙泉古文枿芝詩稿皆刊行子先駿孫澤瓊俱入庠弟儼思歲貢少承兄訓文亦清微淡老有先民風

李文煌字茹中豪邁不羈下筆千言立就文清格奇詩亦險峭以明經選廣文乾隆甲子領鄉薦年六十矣四壁蕭然品修愈潔



黃士茂榜名孝池號秋圃進士玉衡子少孤讀書自立程課弱冠入庠膺乾隆癸卯鄉薦嘉慶辛酉挑發直隸歷任新樂臨城成安安平等縣多惠政每逢瓜代呈請留任者數千人方伯姚亮府嘗對人曰爲守令者當以黃某爲法大計卓異調河間甫四月卒任所士民感泣思之

唐昌湛字凝一增貢生累贈通奉大夫端謹和平恂恂儒者讀書至老不倦性孝友慷慨好施凡邑中義舉捐貲不惜子志拔例貢贈朝議大夫志松例貢贈通奉大夫志本晉二品封典孫曾蕃衍四代科名顯宦人謂其厚德所致

李紹崧字申甫貢生以讀書行善自樂輯有左傳快讀行世捐貲監修府學暨本縣學 聖宮其他橋梁道路利濟之舉

多身任之壽七十六子謙道庠生

張如昱字立菴節孝張胡氏子痛父早逝刻意力行性狷介嚴謹雖盛暑必衣冠危坐嘗會食親友家見座客有盤髮者望望然去之若將浼焉以諸生終

黃 瑩字第聞觀察裳吉之曾孫也少穎異早食餼例貢成均究心濂洛之旨講說詳明聽者無不解釋成就多人著有四書管窺周禮纂要及嶽麓表詩賦成集性孝友館脩先以奉親親歿遺產悉讓兄弟截取訓導不就子孝陞孫又香汝霖皆諸生

黃玉聰字雪明增生爲文清折奧衍不落恆蹊嶽麓山長吳堯山器重之晚年家居與從叔文頤從弟玉韻設立文社一



時名下士多出其門子孫列庠序者多人

熊以文字炳如乾隆丙子舉人家貧授徒孝事後母撫異母

諸弟友愛尤篤司鐸祁陽士林稱仰

周衡臣性孝友長兄歿訓撫孤姪楷棟皆登黌序壽八十卒

以孫平湘任夏津知縣贈文林郎

張世勳世燧同懷兄弟俱善文勳乾隆丙子舉人燧食餼讀

書不與外事勳子翀本庠生晉本舉人燧子玠本以縣首入

泮授徒養母餘以分潤昆仲課督專嚴多所成就子鄰歲貢

生候選訓導

孫先振字嶽亭乾隆甲午舉人官直隸望都武清撫甯隆平

知縣居官廉慎任隆平時值兩京川用兵徵發絡繹一身任

之民不知有差累

張淇本號百泉乾隆己卯副車家居授徒講貫無智愚必反

覆詳盡家庭雍和後司鐸石門卒於官

楊祈迪乾隆壬午舉人挑知縣分發皖城初署太湖民間有

顏如玉心如冰之頌署績溪去任時沿途祖餞實授滄縣入

年樊草政新豪強斂跡以卓異陞亳州知州

俞儀字兼虞號麓門廩生前明京帶指揮使一鱗之裔孫

也崇禎末指揮討賊至瀏邑遇害子孫世居本邑累葉青衿

儀幼承家學十八補弟子員父亮幕遊粵卒儀徒步扶櫬歸

里孤貧奉母彭氏以孝稱母八十餘卒孺慕不衰嗜古學試

輒優等課生徒嚴整有法遇族戚急難竭力營護子超經魁



善化縣志 卷之二十三  
孫敬枝東枝同榜舉人東枝山西學政理枝興甯教諭榮枝  
萬枝俱歲貢生

張雋思字幼升號羅湖吏部郎中汝潤之子十九入庠食餼  
文主理法著四書講義於聖賢性道宗旨俱從身心體味得  
來汝潤主滇南講席時錢南園出其門下及錢視學楚南折  
柬招致辭不就以明經終

張世銓乾隆癸酉舉人選江蘇宜興知縣改諭甯遠陞永州  
教授郡人誦曰公昔官父母今官非父母心猶是父母何貧  
富一視之何高下胥誨之何緩急實濟之可樂可道經師人  
師事詳永州志丙寅告歸與兄世延弟世玠唱酬歡洽壽八  
十七子入庠孫祖楠登賢書官縣令

文上杰字冠南號栗齋十歲卽有志於學家貧無力購書經  
史子集悉取借讀年十八補弟子員舉乾隆癸酉經魁兩任  
會同訓導主講玉堂書院造士有方著有栗齋文稿詩草子  
常增食餼孫守謙入庠

黃孝徽號慎齋平居以忠信篤敬自箴年八十四手一編不  
倦子友樂庠生友召乾隆丙午省元孫維尹維庚庠生維翰  
癸酉選拔負文望俱庭訓所成因病精醫術多活人好施與  
恤兄弟遺孤無少靳卒之日浙中孫崑園觀察志其墓梁山  
舟學士爲之誄葉琴舸中丞爲之傳真完人焉

黃士對號橙邱十歲應童試工詩賦性豪達乾隆丙午領鄉  
薦汎舟徧訪淮揚諸勝題句滿囊武城遇盜同舟惶懼士對



與友談笑自若曰鼠輩不過欲吾財可罄所有與之盜詫曰財無幾但服汝膽三上公車不遇自築半川山莊著作日富中丞姜制軍百聘主澧陽龍洲講席甚優禮之子友第舉人武陵教諭

董簡字以臨原籍山東郭縣祖策前明任湖南方伯遂家焉簡少穎異十五遊泮旋食餼貢成均乾隆甲寅恩賜舉人乙卯授翰林院檢討壽九十一子四長國宗登賢書餘俱邑庠

劉彬原名材號培園乾隆壬子舉人官山東歷署博平臨淄實授海陽知縣誓不受一錢美政多可紀者臨淄民歌曰邑侯劉公為民父母去年飛蝗竭力撲捕成災緩征不惜己

苦大小詞訟葛藤見斧重義如山輕財若土

黃士商字介夫淵亭第四子早食餼文法歸唐時城南文士最盛商課藝與黃宗夏余廷燦屈世昌齊名楊勤慤公目為國士淵亭官雲南惟少子士修侍左右商聞父病徒步往省露宿風餐經月始至循例入明經甲寅會試賜翰林檢討授徒家居有老成典型之望子友仁邑庠生

周平湘字采蘅乾隆乙酉選拔中本省鄉試補山東夏津知縣癸卯丙午兩次同考試官修理前賢祠墓置義學田加諸生膏火歷署知州同知政績卓然

凌之燦字又韓庠生髫齡失怙奉母周氏避亂山中忽出求食為賊所執哀懇迫切賊感其孝竟得釋倡建宗祠力濟貧



乏鄉里德之

凌啟壘字應麓性敏力學以優庠援例入貢充昭濟倉社長廉謹公平壬申歲荒自賠穀百餘石邑侯魏旌以廉正風高扁額懸示倉前族里鉅細是非得壘一言立解

黃孝存號省齋工書法考取三通館校錄將補職以養母乞歸卒於家太史陳士雅曾從學書輓聯云肝胆照人留直道雲烟滿紙有遺書子友遜早食餼廉介不苟父歿後家貧無田宅惟衣物可值數百金悉讓庶弟授徒自給以明經終俞超字升甫乾隆壬子舉人性渾摯以文鳴於時教諸子以義方皆發名成業以子東枝侍御贈奉政大夫

王名佐因父三元從戎禱求生全備至及歸奉養盡歡兩親

歿哀毀盡禮婦女氏能體夫志佐成其孝乾隆辛酉巡撫張旌孝行疏請建坊

彭昌位字素安庠生少讀書有大志仗義輕財所耗散於知交者殆以萬計母年九十五左右奉養衰役必躬親兄弟五人析居近里扶杖往來日或數至依依如童稚時子寶林庠生孫右文明經

黃夢桂號馥菴渾厚寡言不喜談人過惡事不欺心財不苟得子文炳以選拔中式任教諭文燮以優貢中式任知縣孫垣庠生壽八十三

黃夢聖字儒師存心正直篤宗族和鄉鄰孫德聰舉人明辨明健德輿俱入庠



善化縣志 卷之二十一  
楊之棫字作人一生足跡不履公庭屢困童試不肯廢業孫國紱登賢書

黃玉韻字佩齋父文淇太學生任俠好義韻兄弟四人玉建玉潔玉曉俱庠生韻績學不遇爲子弟立文社講貫切劘子孝惇丙午登賢書孝恂游鄉校

黃孝復字子元庠生文光之孫也爲文喜奇詭愛讀南華經早食餼循例貢成均司鐸清泉與諸生論文多闡發奧義張瀾本國學生性渾厚喜周乏鄰人遭大疫無至其門者瀾親爲診視得活一家子祖綬庠生處兄弟善讓中年無子買妾已付百金女不願從卽召女父領歸不責償後另娶生子子長嶽中嘉慶丙子經魁自有傳

劉官詡字以謙歲貢生言語樸誠經藝淹博教授生徒多所成就爲羅慎齋之師補武陵訓導壽八十有八

彭文溥文洪同懷兄弟也溥字博先庠生有風度重倫常堂兄文泮庠生早卒無後溥爲撫堂兄明經文漢子竭力代爲支持文漢卒母老無依爲終其養壽八十一子明良東明孫開晦俱入庠孫開蕢元孫玉軫舉人文洪庠生有節概樂施與宗族鄉里多所沾潤無子撫溥子明訓爲嗣孫開恕庠生明良壽八十二明訓壽八十四

陳尙時字宗孔性質樸遇邑中重大公事踴躍襄贊倡輸重金無所吝其他樂成人美善舉甚多壽逾八十夫婦齊眉子孫列膠庠膺選職振興未艾



張之嵩字配崑節孝張鄒氏之子早失怙善體母志兄弟同財待子姪分多潤寡合族修祠置田供祀子光泰孫汝玉俱庠生

柯達道柯隆慶之子天性純篤母病咽喉破裂百藥罔效道達禱於神持刀割左肘肉和藥煎之服後遂愈割處痕迹衆見宛然

李逢淇州同慷慨好義高大中丞以樂善好施旌其門年九十有四子孫列鄉國學者五人

蕭維祺字翼菴庠生事庶母待庶弟恩誼殷拳作室掘地得金語其傭曰此而物也與之遇力作不能贍家者酌給穀米冬月散給棉衣死者助以棺槨雲南陳某與祺莫逆後落魄

生館死殯惟祺是依子于燦宏猷孫鄰智俱庠生

張人憲廩生事親孝雖匆遽出入必告親病侍湯藥衣不解帶者彌月兄弟析箸田宅美惡聽所處教授生徒多所成就子蓮元庠生

陳心一兄弟四人仲叔先後繼歿母病目盲心一以舌舐之年餘日復明壽至九十八長兄兩子貿易鄖西一子暴亡乃迎兄嫂在家供養兄病噎必視其食下咽乃食兩寡嫂遺子幼爲教讀婚配乾隆己亥荒歉有鬻妻者心一出穀全之萬應元母年六十餘寢疾垂死元痛哭願以身代因呼其子曰我割肉救親有汝不至斬祀乃剖左股肉烹以進母食之立愈事聞巡撫盧旌其門曰孝足維風母八十餘方卒



楊明捷邑明經生平敦孝友好施與通緩急人咸稱之

黃孝彝增生早失怙兄孝職敦請名師課讀比析箸兄家計窘乏彝推解無所恡兄亦坦然受之稍不當意輒怒形於色彝唯唯受命相對怡然授經餬日子友度孫維亮皆庠生韓運字應清庠生事親孝母病思李遍求無所得坐地號泣忽遇賣李者投數顆而去忽不見

龔超第庠生學行方正居家儉素有族人爭山不休出已園分給以平其訟臨終焚借券四百石爲家訓數則言皆切至其餘義舉甚多爲鄉里矜式

凌開燁字子文監生慷慨好義弟彩少孤爲兵所掠燁乞救甚哀賊感釋之季叔苦貧燁成父志爲置家焉姊適周貧苦

給田課孫成名貸貧人穀千餘石焚其券獨修大橋五所鄉人遇事得燁一言曲直立分

陳仁珍字德重十歲失恃常悲念不忘年六十猶茹素三年曰吾不得事母聊以志慟耳好行善事施棺修路或先眾爲倡或一己獨任承辦育嬰堂事方伯邑侯題扁旌之

陳國模庠生家貧舌耕教其弟成名幼失恃事繼母孝得其歡心年二十六而鰥不再娶

蕭芳禰庠生少失恃事繼庶二母色養兼盡待諸弟極友愛訓誨成名茶陵故人陳姓落魄孤貧濟其衣食死爲殯之湯建中執中兄弟皆諸生父早卒事母以孝不肯俱離膝下兄出則弟留弟出則兄留合爨同居六十年建中兼善醫多



善化縣志 卷之二十三  
所全活孫曾入庠者多人

蕭以隣字秉昂增生善事繼庶母待異母弟誼尤篤胞叔某  
中年孤迎養於家生卒盡禮堂姪婦黃氏貧苦守節隣經理  
之嘉慶六年減糶穀四百石捐義冢山其他解推之事頗多  
子大觀大光庠生

凌 霄太學生幼失怙出入無違母命兄弟友愛踴躍公事  
邑侯張賜共勸善政扁額年八十卒

曾飛雲幼失怙事母色養至老不衰待宗支有恩禮無德色  
雍正五年荒出穀賑貸計百餘石鄉里稱之

王正健例貢性孝友父母歿後撫兩弟終身共爨遇族中爭  
忿必竭力排解捐囊不惜值荒歉減家口食以賑之又出錢

穀贍貸人賴以濟

凌啟陞庠生事繼庶二母得其歡心季弟啟隆分筋後家道  
日落陞分貲讓產至老友愛不衰兵興時族有富大差逃走  
者陞爲出銀賠償及其人歸酬以田陞卻之

陳正魁母患目疾不愈正魁夢醫持其手曰以此和藥醒而  
悟遂割左腕和藥進母啖之漸愈父患瘰垂危又割左肘作  
羹進父旋愈

沈 楫字雪友號石帆原籍會稽歷遊臬幕乾隆四十二三  
年曾列苗洞中種類管束教育輸將四至風習六條滙爲一  
帙後十餘年苗民不靖當事訪得其書始知堵剿招撫安輯  
之法好讀書著經解一百六十餘條有兼山堂詩草子昌世



孫清鑑均邑庠

唐名登字文臺事父母生敬歿哀性直好義捐囊助乏里稱長者

林大器國學生原籍福建泉州例滿入籍喜急公修訓導署捐銀一百七十兩教諭署捐銀二百四十兩嘉慶六年助賑銀二百兩十三年助減糶銀一百二十兩子燦孫勳均邑庠繼起入庠食餼多人

周 琇貢生乾隆辛酉戊辰奉示賑饑平糶及捐修義渡橋梁街石總五百餘金子孫登庠食餼者三人

湯 錦湯 鏢性喜施與族某流落在外召之歸義給田二十五畝錦卒鏢待錦子誠中如己子鏢子三均入庠

郭朝榮嘉言曾孫也少失怙嫡兄別爨與生母相依喜施與歲歉貸穀千餘石不索利不能償者焚其券生平恂謹里黨稱賢

劉世臣好行善事常拾遺金坐俟還之年七旬自置棺見河下溺死者卽捐棺葬之又常雪夜獲賊係里中人諭以宜惜名節遺之衣米其人由此改行爭訟者力爲勸解務使悔悟年九十餘乾隆元年舉耆善給八品頂戴

劉克昌農民也曾於湘江古中渡捐田八十畝石竹塘側有古墓百餘低陷捐金修培完善其他善舉甚多上憲褒以好義可風壽七十九

陳俊煒字仲生仗義扶危同里有逋賦欲自盡者煒代償之



族戚貧者給田棲耕承辦育嬰堂全活甚眾修濬灣市碼頭  
借常平穀碾米賑饑乾隆三年舉耆善授八品頂戴  
凌之端字宗漢例貢倡族建宗祠族有鬻身者捐金贖之有  
逋佃棄家仍召之還湘陰港路險渡艱熾爲闢山開徑置船  
建橋置社倉殯他鄉客死善行纍纍

甯思明字澤生性好施濟建南門外金雞橋傾貲數百金捐  
穀賑饑捨棺殯葬寒施棉襖並給薪炭憐旅病醫愈兼資路  
費排難解紛恤孤全節善行種種鄉里稱之壽八十三  
劉君玉名世傑髫齡失怙事母克盡孝養性純慤多隱德每  
逢歲歉頃囊救濟復借常平倉穀發賑全活甚眾曾救覆舟  
九人內有茶陵鄧姓溺死施棺瘞之榜衣履年貌於道明年

其家証同伴單某謀害乃訪聞開驗於屍傍包搭中得二十  
餘金事乃白有司以聞 恩賜八品頂戴壽八十八

吳應元嘉慶五年捐修團港興賢橋約費百五十金妻蕭氏  
壽八十四亦喜施曾孫森甲運鍾俱邑庠

徐 遇監生親歿廬墓嘉慶辛酉減糶穀百餘石有因貧鬻  
妻者給金全之

韓之煊太學生勇武有膽識鄉俗養神兩境爭先不下格鬪  
輒數百人煊聞之毅然往路出兩壕間鄉人聚石山上禁助  
鬪者煊持竿過石如雨下厲喝曰某在此眾遂垂手而竄諭  
以利害慨切開陳自此風遂息凡勢族許訟不休者導以至  
誠無不解散或爲仇家所陷必爲協助生平周困恤乏全人



嫁娶事甚多捐黃金匿義山一障至今家纍纍云

戴啟師樂善好施奉旌建坊

許上治字子從慷慨好義以詩書訓子孫子知璣舉人任知縣孫定元歲貢生

侯綽性慈仁喜周恤有鬻缶者嚴寒不能自存綽給以衣食得免死嘉慶辛酉奉公減糶數百餘石子開創國學孫曾振起

周承旦字震侯庠生性剛直人敬憚之丙戌旱饑承旦出粟三千石以賑貧乏凡修橋梁平道路動費千金無吝色

凌啟坦例貢生尙義輕財如建祠宇輯家譜皆勇爲之乙酉貸出穀百餘石焚其券妻王氏壽九十一亦喜施濟

楊大寅監生武魁惟秘之子嘗客荆沔遇舟將沈有人疾呼云能救一人者予白金二十已而舟中七人皆救酬直不敷寅卽如數代償壽八十二子所蔽太學生樂施濟有父風  
張涖字莊吾性倜儻好施善醫多全活當事疊賜扁額子孫列宮牆者多人著醫書四十卷

張萬禮字德先純謹好道飄然塵外學精岐黃濟人甚多無貧富皆不計利卒享高壽

葉正先精醫術潔製膏散施與性篤友愛弟早逝推產與姪不時調恤並代爲撐持壽九十一



善化縣志卷之二十四

人物二

唐 煥字堯章號石嶺乾隆辛酉舉人知山東平陰縣雲  
門山產石上官檄采助泰山廟工煥力陳擾累事寢修學校  
濬城隍明慎折獄踰年邑大治調知昌邑縣築王可堤遏濰  
水之衝又設土牛植檉柳爲久固計民利賴焉告歸後家徒  
壁立杜門著書精研易理有石嶺文集尙書古文辨僞行世  
祀名宦子仲冕孫鑑皆由甲科至藩司

黃 鈐原名天迪少嗜學專心經史工詩古文詞乾隆己卯  
舉人歷任山東壽張蓬萊泰安知縣廉明勤幹卓有政聲遷  
青州分防府乞休後卜居邑之東鄉圭塘培植後起以曾孫



善化縣志 卷之二十四  
倬晉贈一品

鄒岳號名山忠厚勤儉捐祀產篤宗支鄉族貧者罔不調恤歷代祖墓山地多失於明末兵燹竭力求全舉族賴之子士翰字六輝太學生克承父志值歉歲出穀四百餘石代償其父爲社長時貸穀之戶義舉類此至今子孫登賢書列仕版食廩遊庠爲盛云

王愈哲號仲明質敏好學篤孝友敦氣誼淹貫經史爲文奇邁著有陽古草堂詩文集

曾尙佳號兼五性廉介曾拾遺金道旁坐待以還原主事母孝有人所難能者平居詩酒自娛尤愛佳山水多宿山寺清逸之士也孫興仁舉人曾孫毓璋先後官江西馳贈四品

賀國華號用賓司獄宏聲孫寬平仁恕習法家言念刑名關係甚重治獄必反覆詳慎子啟曾念曾皆以刑名佐當事多所矜全啟曾舉丈夫子八以長齡雲貴總督三世並贈如其官熙齡爲念曾後亦贈如其官

賀之漳號趣園庠生力學能文著有趣園詩集同邑李朗軒器重之謂有宋儒學問

黃玉泰玉李玉桃同懷兄弟均太學生李早卒泰桃事母以孝聞母卒時壽九十三孺慕號泣廬墓三年置田建祠至耄猶率子孫躬親拜掃泰子孝榮渾厚寡言嗜詩文至老不倦桃子孝超好施與太守張贈以允廣福田扁額李子孝陔見義勇爲倡建同善堂道光中水災疊次倡賑全活無算孫友



名篤孝友父病焚香籲天願以身代父尋愈待諸弟析產多讓孫及曾元補弟子員入成均登賢書銓選訓導縣佐繼起多人

李啟漢號雲階博通經藝由郡增生中乾隆庚寅恩科舉人歷任廣東開平合浦大埔增城高明高要知縣咸有治績勅授文林郎曾孫忠燮邑庠生

曾衍先號補之少孤苦習吏事足迹半天下正直律已義利分明年三十餘杜門不出倡建宗聖廟爲奉祀生朔望行香致祭雖大風雪必步行至老不倦著有話陶窗稿以子興仁孫毓璋貴晉贈四品

唐仲冕號陶山幼承庭訓學有本原乾隆甲午順天舉人改

歸原籍癸丑進士歷官江蘇知縣海州知州蘇州知府福建福甯府江甯河庫道福建按察使遷陝西布政使護理巡撫年老致仕僑居金陵文學清望推重一時有陶山詩錄文錄其任海州知州也興利除害大著循聲鄉民爲立生祠江督陶澍奏入名宦性孝友以其父官平陰貧甚母卒不能歸櫬營葬肥城鴟夷山山故陶山之麓因以爲號結廬墓側撰岱覽三十二卷令原之感風木之悲時形歌詠子鑑太常正卿銜江南通判籤甘肅知州

龔鶴鳴號曉山乾隆丁酉舉人丁未進士歷任河南武安洛陽延津沈邱知縣遷許州知州廉明仁愛性孝友有異母兄棄儒服賈負債致訟售產代償之姊適陳少寡而貧以時周



給並授產撫績其嗣子元理直隸巡檢孫德鈞副榜選教  
張如閭號侍賢庠生氣度端凝日與族竹軒立菴以經學相  
切劘至老督課不倦以子汝顯教授贈修職郎  
黃友召原名友教號雨棠乾隆丙午解元歷任浙江慶元知  
縣廣西慶遠同知太平桂林知府護江左兵備道所至俱有  
政聲 冊封越南王護使著有越南紀略壽九十一長子維  
甸國學生歲歉率家人食粥糜餘穀減價以資鄉里次維尹  
庠生三維韓拔貢由教諭擢山東東阿鉅野知縣鉅俗多度  
樞不葬值歲旱尸久爲魃出示限日葬數千具甘霖大沛四  
維庚以縣首補諸生輕財重義左杏江中丞聘修城南講院  
資斧自備孫式常廩貢生新化訓導

徐 坦號履安乾隆戊申經魁歷任河南扶溝伊陽襄城武  
安知縣解組歸壽八十八子德鈞國學生德慎從九職忠嘉  
慶戊寅舉人平江教諭德恭從九職孫沛然同知銜歷任直  
隸河間豐甯曲陽清河知縣子孫入廩庠膺選職多人  
蕭大經號雲巢乾隆癸卯優貢己酉舉人鑲白旗教習爲相  
國英煦齋教讀選道州學正署雲南霑益賓州等州昆明會  
澤等縣補師宗縣知縣惠政及人弟大本號立夫嘉慶辛酉  
拔貢歷署新昌永豐知縣定南廳分防同知政聲卓越  
張汝爲庠生弟汝治汝潤皆官於外汝爲居家養親課訓子  
姪泊然寡營待人渾厚七代膠庠書香不替  
張 楮號紹夏庠生八齡失怙廉正自持卹孤賑乏鄉鄰義



舉身任不辭董率族眾建祠修譜居喪不用浮屠三年衰經不解治家有法族黨欽之

黃孝澤號德潤博覽羣書不貪榮利大吏延致幕府多贊成善政終日端坐無倦容鄉鄰有訟者得一言立釋贈五品封孫曾入膠庠登賢書十餘人

黃士修號潛夫隨父炎任滇守時能得歡心歸家四壁蕭然典鬻供甘旨父歿後修年漸邁子友正自甘淡泊奉菽水必豐潔時伯父介夫檢討堂兄春臺文學皆貧乏甚賴友正贍奉並存恤撫誨其子孝友一門先後濟美

劉泰號吉平居心仁厚每當風雨連朝黎明卽起視鄰人有不舉火者卽以錢米周恤鄉鄰德之稱爲旭旦劉公

張陳錫號葯房乾隆己酉舉人大挑知縣不就築經郭草堂讀書其中工詩古文詞戊寅主修邑志暨學宮諸務效力尤多授道州學正著中庸講義鄉黨約典經郭堂詩草待梓黃玉儀號雲樵穎異嗜學乾隆壬子舉人戴蓮士繆申浦兩學使稱爲楚傑截取知縣年老不仕教育後進多成名主修邑志著有響玉堂詩文集

唐志拔志松志本同懷兄弟拔號粹中制行立身力敦古道志松嗜學能文早卒志本號南田處世和平治家嚴謹有法痛兄早逝代理家事教育遺孤克盡心力兄弟衡宇相對阡陌相連雍穆往來閭里稱羨少失怙事母俱克盡其道身處素封黜華崇儉鄉城善舉忻然出重貲無少愆拔壽八十三



晉四品松晉二品本晉二品拔子方煥方煜松子方煦本子方燮自有傳

張汝敏號敬修賦性長厚言坊行矩有子七人一庭孝友中年析居衡宇相接敏夫婦白首齊眉數十年中幾不知人世間有不如意事壽至九十餘先後月餘相繼令終孫曾登賢書食廩餼文武選職多人贈五品

游元素品行端方工古今詩體與邑人郭浚張九思爲文字交授徒鄉間及卒九思爲立處士游君傳

張萬青萬忠萬選同懷兄弟嘉慶辛酉奇荒出穀二千餘石減糶便貧戶遠近德之青子明煥明志明上忠子明典明玉明桂明見選子明耀明哲各承父志慷慨仗義修觀音港橋

合捐千金爲眾姓倡碑記修桐溪港義渡兩岸建亭合捐八百餘金萬忠又捐田七十畝並眾捐泐碑孫元燮捐金獨修任陂港渡及桐溪寺後石路其他置祀田建宗祠善舉多端文武弟子員廩膳鄉舉選職代有人

李紹文號書田世居曲塘爲兪鹿門唐堯章兩先達高弟侍祖父疾衣不解帶者六閱月與伯兄重建宗祠置祭田肫肫以敬宗收族爲念處世退讓有犯而不校之風

羅琦號麓西幼失怙安貧力學乾隆甲寅以廩貢中北闈舉人嘉慶辛酉進士官中書由江蘇太湖同知遷鎮江蘇州知府擢江南兵備道樸誠渾厚清慎自持爲陶文毅林文忠所推重解組歸奉親贍族主講城南倡明經學士林戴之孫



曾多人邑庠

張士第居邑東青雲峯下號雲峯母沒築廬墓側名白雲亭讀書其中三年足未入寢室以府試冠軍入庠食餼後父沒合葬母塋廬墓亦如之中乾隆乙卯舉人賦性嚴正坐立有體雖盛暑必著長衫教授生徒一準禮法著有白雲亭文稿壽七十七自撰白雲亭記終身孺慕不衰子承蓋舉人零陵教諭承盛承益俱庠生

唐業謙號受堂甫八歲畢五經十二齡入庠旋食餼中乾隆乙卯舉人嘉慶戊辰進士由庶常銓禮部主事轉郎中歷任河南南陽安徽太平江西瑞州知府其在禮部也徒步趨公嚴別吏弊一時以風節名守南陽郡苦水患爲築石壩以資

捍禦境多複嶺捻匪出沒其間躬督緝捕獲渠魁置之法任太平瑞州勤政亦如南陽告歸後儉素如老諸生壽八十四著默耕齋文稿美延書屋詩文集宛南政考子晉高庠生寬候選州同銓藻舉人官訓導

陳遠璠遠澤同懷兄弟遠璠號奐若國學生振作有爲壽逾八秩遠澤號雨亭附貢生讀書立品受知於錢南園學使制藝多登試牘兄弟均持家有法訓子有方一門鼎盛孫曾繁衍嘉慶丁卯歲大旱捐米數百石賑饑西城外義渡之設輸助多金其急公好義類如此遠璠贈五品遠澤贈二品

劉宏鍾號秀萬理問職慷慨好施與獨修萬福橋栗山橋倡修三搭橋捐白金四百餘兩橋成俗有先過不利之說鍾曰



橋以利行焉有不利若果不利當自任之遂自行先過亦無恙重修婆仙金輪寺捐田資香火斗石山昭覺寺嵩山寺諸名利捐修無少恡施藥施棺至老不倦存公田數十畝顏曰永青堂諭子孫以歲租所入永守爲祭祀施與之資子懋沾國學生晉贈二品好義急公克繼先志

劉宏鉉號位台從九職善承先志誼篤友于夫婦大耋齊登後嗣振起

張陳鑑號紹齡監生疎財好義嘗自省垣歸夜行荒野間遇羣盜謀欲劫之一盜忽叱曰此西塘張某也列炬縛竹爲肩輿送之歸生平焚券減糶義舉甚多倡修大培橋私塾三百餘金不自德邑侯丁香溪契重之

孟衢光號梅溪優貢生舉嘉慶元年孝廉方正巡撫姜晟請給學殖行修題額精岐黃青烏諸術樂善好施著積善錄梅溪詩草葩經摘要諸集

鄒本然號心田監生敦品力學以課子訓孫自娛著有隨意詩草子孫多遊庠食餼登賢書入仕籍皆食其舊德云黃孝選太學生仗義急公凡橋梁寺院育嬰義渡諸善舉靡不踴躍助成邑侯托慕其才公事恆倚重之子友信登賢書寶慶教授

鄒本碩號大田監生敦品力學從先達郭維城遊甚見賞契嘗言此吾畏友不當在弟子之列詩酒自娛以富壽終顏其表號效思太學生一生忠厚勤儉自持喜周貧乏地方



義舉出重賞無吝色壽七十二孫曾繁衍

張晉本號浣山宏才博學豪放不羈工詩文善書翰嘉慶庚申南闈副榜辛酉北闈舉人喜結納海內名儒所過名山大川多所題詠壽八十著有達觀堂古文詩集詩話

彭家真號香山嘉慶辛酉舉人幼失恃事繼母能得歡心父歿喪葬如禮廬墓三年伯兄故一子幼教養成立居恆博通經史主講三江濂溪岳陽書院得士稱盛以大挑知縣改授安仁教諭訓士有方士林重之

言衍戲家貧嗜學博通諸經書法秀勁授徒自給束脩外一介不取著有弦歌餘韻詩草

黃德聰號聽彝嘉慶辛酉舉人家居讀書鍵戶不出就養無

方建宗祠置祀田纂族譜嚴家課鄉里義舉捐施無吝任郴州學正嚴謹有法以壽終子孫入庠序貢成均克濟美焉、蕭宣昭號廷裕國學生性仁厚家素封見貧乏急難務爲推解出重貲倡建同善堂邑中有重大義舉當事延與商辦無不慨然任之子孫入膠庠登賢書列仕版者繼起

羅 超號玉峯嘉慶甲子武元戊辰進士兄弟三人後先捷武闈超以儒家子備員武職仍務耕讀以姪教忠贈四品楊世安號巨川貌頎偉幼業儒入武庠嘉慶甲子中丞姜甄別書院甚賞其文是科中武闈鄉魁仍勵志詩書著有淨窩前後詩集

張 城號雉干敦品好學孝養雍睦好義急公膽識過人工



擘窠大字喜讀經世有用書精岐黃術善風鑑子四廷銓廷  
鏞均太學生廷鏡優貢生廷鉞增生後嗣列膠庠領鄉薦者  
繼起以國子監典籍改加理問銜壽九十二晉贈四品  
余嘉集庠生性孝友持身嚴正教授生徒多顯達詩古文辭  
為羅慎齋山長所賞識有文稿待梓

劉朝燮號理齋附監生嘉慶甲子順天鄉試挑取國史館膳  
錄任四川鹽源縣丞庭除蕪蔓庖人每刈以代薪川督聞其  
廉權冕甯知縣興利除弊政成民悅因公下鄉冒雨得寒疾  
病革時屬其友與僕篋存養廉百金足殮以歸毋受民贖贈  
遂卒子鍾浚庠生錫源廩貢銘盛郡庠錦綬江西同知崧候  
選經歷孫樹仁湖北州判禮振庠生

胡開梅國學生持躬端正遇鄰里忿爭力為解釋貧乏垂危  
者輒周恤之邑中義舉當事恆相為倚重子光煦庠生孫果  
國學生府經歷銜

賀長齡號耦庚生而英邁以嘉慶丁卯省元聯捷入詞垣典  
廣西鄉試授山西學政 記名御史轉左春坊日講起居注  
道光元年出守南昌擢山東道歷任廣西江蘇按察使陞江  
蘇布政使調山東布政使護理巡撫調江甯布政使內艱起  
復由直隸布政使陞貴州巡撫擢雲貴總督適永昌回變左  
遷河南布政使假歸薨於里第宣力中外垂四十年禮士愛  
民興利除害政績丕著公餘力學日取先儒嘉言懿行以自  
淬厲晚尤致力周易時郵書唐太常鑑往復參辨不為苟同



所著耐菴文存詩存及經世文編學術治術皆備海內風行  
嗣子貽令副榜同知銜候補內閣中書孫曾繼起未艾

賀熙齡號蔗農髫年入庠領鄉薦由詞苑入臺垣歷掌河南  
京畿道監察御史任湖北學政請養回籍外艱服闋補山東  
道監察御史以目疾乞歸御史任內奏議俱關國計如請緝  
湖面萑苻飭查瀕湖私垵端士習懲誣告嚴究訟師胥役作  
奸臚陳鹽務河工積弊條奏苗疆九事一時臺論翕然督學  
湖北整頓士風兢兢以爲國儲材爲己任前後主講城南  
書院入載輿前撫吳榮光倡立湘水校經堂訓諸生立品窮  
經晚年築室東城讀書課子顏其居曰菜根香著寒香館詩  
文鈔行世子毅候選訓導瑗廩貢浙江慈谿知縣運同銜瑀

湖北候選縣丞昇運舉人甘肅甯朔知縣同知銜

黃文炳號蔚堂文燮號理堂同懷兄弟均善書時有二王之  
稱炳嘉慶辛酉選拔丁卯舉人任新化教諭訓士有方著有  
蔚堂文稿燮乾隆乙卯優貢嘉慶戊午北闈舉人鑲白旗教  
習歷官甘肅文縣江西安遠知縣多惠政

唐鑑號鏡海勤敏好學嘉慶丁卯舉人已巳進士授檢討  
補御史剛介敢言出知廣西平樂府安撫民謠多惠政士民  
建生祠祀之遷江甯糧道擢貴州按察使遷江甯布政使內  
轉太常寺正卿以年老致仕主講金陵書院咸豐元年赴京  
召對十五次中外利弊奏對詳明

特旨嘉以品學兼優器識安定賞加二品銜仍回江南主講矜



式多士旋以粵賊犯楚念切墓廬咸豐三年自浙還楚服官三十餘年父子皆位至藩司清苦異常著書二百餘卷如省身日課易牖讀書小事記學案小識朱子學案畿輔水利諸書皆多心得實踐之言壽八十五當永訣時具遺摺函寄兩江總督曾國藩代奏 諡確慎弟錢號竹泉官甘肅古浪丹山知縣涇州知州多惠政著八百軒近體詩稿

黃樹維號晉鳳性孝友補弟子員力學不倦經史丹黃數易其本晚精岐黃術診視不辭勞瘁待人以誠爲鄉里所推重孫仁政仁普登賢書仁聲邑庠

高遠澤號衡峯國學生慷慨和惠恤孤濟貧里有爭訟必愷切開陳人多悅服居平事父母澣縫庖湔不假手僕婢年六

十焚券數千金以壽終贈修職郎子第郡廩生南英武庠生馥陝西吏目映瀾新化訓導國子監學正銜

羅 瑛號石友嘉慶戊寅舉人丁丑進士庶吉士篤孝友能文章工篆隸主講石鼓郴陽書院澹泊自守和藹可親人有惑以非義者則屹然不可奪生平制行類此

周班翰庠生家貧力學敦氣節嚴取與家無儋石泊如也著四書講義十餘卷子有聲邑庠

畢光堯號莫陔嘉慶庚午舉人甲戌進士署甘肅會甯甯朔等縣補敦煌知縣勤廉自勵涖會甯修縣志清積案任甯朔時值回逆張格爾犯順兵差絡繹將軍某率蒙古索倫兵數千獍勇剽悍所過皆苦供億及取道甯朔督兵者聞有畢青



天之稱特飭所部無得擾害父艱歸讀書自娛以子大錫晉贈二品

劉宏鏡號南淙從九職好義急公創建南山驛公署往來官吏稱便邑侯李其豐贈以南陽偉緒扁額

鄒本惇號允元庠生解紛排難鄉里賴之性友愛兄弟析居後無日不往來日爲事阻雖夜必至長兄早沒待姪猶子後嗣書香繼起

俞東枝號岱青與胞兄敬枝同中嘉慶癸酉舉人東枝壬午成進士由庶常授編修道光辛卯典試中州旋督學山右授廣東道監察御史彈覈無私歸田後朝政大小靡不關心咸豐壬子粵逆竄省籌守禦之策桑梓賴以保全誼切友恭分

貲產助昏葬壽七十一子四錫霖廩生六品銜出繼伯兄朗垣錫祺錫年俱候選訓導錫冠郡增生

黃士矩號少方讀書養氣遇有紛爭出貲排解罕令人知沒之日向有奸黠逋租者聞喪泣弔稱善不置子友諍友淡孫維錦先後入庠

黃士綺號錦堂庠生幼慧能文著有廬山詩集道光辛卯湖北水災米值日昂有勸其緩糶待價者正色曰天災流行人受其害我蒙其利於心安乎卒減價以糶里中豪富多化之子賜履成進士

張星煥號掖垣生有異稟十歲能文以優行貢太學中嘉慶丙子舉人庚辰進士由庶吉士改授安徽繁昌太和知縣初



任繁昌時歲大祲盜賊蜂起餓殍盈途躬親履勘請賑捐貲  
勸富減糶多所全活嗣任太平反前令重案例得保舉不  
居功族無祠譜以所積俸創爲之子福楚福履均庠生孫雲  
鐸副榜雲錦舉人雲棟五品銜

張 嶽性孝友敦品立學讓產諸弟中嘉慶丙子經魁授靖  
州學正敦崇實學中丞訥以學裕才明奏陞知縣嶽以母壽  
八旬不就任靖二十餘年修學宮建惻隱堂籌書院膏火陞  
永州教諭卸任時士紳遮道祖餞子敬思國學次登科次愨  
孫萼均入庠

曾興仁號壽田嘉慶丙子舉人大挑知縣官江西宜春廣昌  
建昌崇仁分宜萍鄉等縣充甲辰鄉試同考官所蒞邑惠義

廉明化民以德遠近戴之嘗減從入鄉察民隱行保甲爲規  
畫久遠計遇有爭訟卽止其村數言剖斷靡不帖服公暇練  
壯丁如營伍不稍懈境內肅然其他政績詳宜春建昌廣昌  
崇仁各邑志性篤孝繪版輿迎養圖名人題詠甚夥文以古  
淡爲宗尤精篆隸著有樂山堂詩文集縹緗新記硯考省身  
日記曾氏遺書續錄集句楹帖都門雜記子毓璋官江西知  
縣毓傑博士弟子員鵠四川鹽茶經歷以知縣用孫傳均廣  
西知縣

黃士凱士綱同懷兄弟孝友於家凱性樸實綱性嚴正遇爭  
競片言立釋周給貧乏鄉里稱之  
楊之柄號仲任性寬厚與人無忤有以非禮相犯者不與校



其人卒感而重之又嘗與友合貲分金聽友多取人謂其有  
鮑叔之風

湯發端號秉正監生慷慨好義家素饒有盜入室去後訶知  
爲鄉里貧民備酒肉招至謂之曰爾等所爲如此若鳴於官  
俱罹法矣反復開導終不洩其名後多化爲善良壽八十二  
子粹然庠生銘新廩生

湯發秀號實之庠生文品純正人亦如之居近白田驛市中  
博徒見其遠至必斂具退避鄉里紛難眾莫解曰必俟湯某  
至乃斷淡於進取以諸生終

譚家縉號雲亭太學生性端介隆師重學訓課維勤睦鄉鄰  
周貧乏地方義舉捐助必豐詩禮相傳次孫世翊舉人武岡

學正世薰增生曾孫紹棠紹橋俱廩庠

譚家紳號正笏廩貢生博通經史性剛直而慈仁遇歲歉夏  
秋之交農家乏食必捐穀倡資接濟地方公事裨益良多壽  
九十一孫曾林立多列膠庠

楊璋號玉田太學生具才識董修嶽城書院部署井井同  
善堂滌灣義渡邑中義舉身任最多弟鶴聲號九皋太學生  
性孝友事父母朝夕定省不懈侍病尤爲竭力睦鄰任恤鄰  
里德之子應年庠生

楊振聲號育泉歲貢生候銓訓導性孝友家僅中貲以利濟  
爲心凡調恤救嬰惜字諸義舉罔不力行平居教子姪敦倫  
植品常以爲善最樂讀書便佳八字詳悉指陳壽七十六子



壽彤同治丁卯舉人

陳岱霖號慶覃嘉慶戊寅舉人庚辰進士授工部主事兵部郎中歷掌福建河南京畿道監察御史刑科給事中道光庚子會試同考官湖北鄉試副考官監察任內凡所敷陳如苗疆四宜漕務三弊懲役以靖匪糾吏以弭盜無不搜決利病時海夷未靖疏論反復數千言又請申脫逃之律以嚴節制汰游民之冒以實行伍居諫垣數年覈實指陳皆關天下大計著有雲石詩存行世子彬綬編修壽鈺附貢彥綬庠生張光泰庠生性渾穆喜讀昌黎文手鈔成帙著有詩義緒餘春秋周易集註策學集要玉屏詩話修祠宇捐祀田見善必揚遇紛必解族黨稱之子汝玉庠生

湯燦號曉霞國學生性豪邁績學能文樂施與獨修白田橋工費甚浩值歲歉貸出社穀無入者出己穀償之著有癖杜山房詩草子積之積鈐一時名諸生孫琳花翎五品畢魁兆白彝訓俱廩生唯畢魁先兩弟而卒卒之日將課藝改完召諸徒訓以敦品作文之道勗勉備至日行西時由館歸家命家人治酒飲畢衣冠端坐而逝

黃孝紀貢生進士玉衡長子性嚴毅雖燕居無失容績學能文教育多所成就孝親友弟不私一粟同胞弟孝存子友愛貢生能承父志析產讓多取少生長富厚布衣蔬食晏如也博綜羣書旁及內典三禮左傳皆手繕全部著有碧峯文稿孫維重維同另傳曾孫式蘇殉難給世職式朔舉人潔之進



士吏部員外郎

俞孝選號翰園嘉慶戊寅舉人經術湛深至老手不釋卷除教讀外若別無所知渾金璞玉之品也以壽終

周朝宗號硯山聰明特達十九入邑庠試輒高等食廩餼肄業嶽麓早夜習經史與友聯文會日成數藝山長羅慎齋以詞翰目之惜不永其年未竟厥志

楊在煦號晴溪生有至性四歲喪母哀毀如成人大王母王母兩代苦節事之能得重闈歡少補弟子員旋以歲試冠軍食餼家貧授徒得束脩悉以供甘旨爲學務實有心得實踐平居訓子曰論語首言學次卽言孝弟所貴乎學者謂其能務本也今人不知務本酬酢往來不難竭情盡力至內願同

氣饑寒憔悴或且秦越視之此所謂本末舛逆中庸不可能世教所由衰也寥寥數言可以知其學行所在矣著有常惺齋文集學者稱爲晴溪先生以明經官衡山教諭假歸設教里門多所成就子任光舉人能以學行世其家孫瀚先廩生澍先光緒丙子舉人

孫葆恬號劭吾嘉慶己卯舉人選桃源教諭父先振舉人直隸隆平知縣本生父先捷庠生奉事皆孝養備至大計卓異以知縣用不赴鄞縣沈栗仲令桃源以文學心性交相知最深子鼎臣頤臣觀臣自有傳

羅象辰號紫垣道光壬午舉人癸巳進士任山東朝城縣興利除害清介廉能諭子姪家居讀書以期有用不令偕往任



所輿頌翕然以丁母艱卸篆兩袖清風父年老患風疾侍養益篤以子教忠晉贈二品

黃理元號中洲庠生敦行力學平生志不在溫飽肄業嶽麓講求經藝山長羅鴻臚深相器許著課子錄輯古名儒法言爲敦俗寶鑑子雲鵬庠生雲驥廩生昌鳳附貢國子監典籍孫振卿郡庠

熊嗣熙號清亭太學生性謹飭取予不苟財物分人醫藥濟人家貧奉親獨厚親病侍湯藥衣不解帶督子弟嚴而有法卒年七十六

李傳典號舜卿太學生生平別無嗜好唯用力於周易一書如飲食之於饑渴至老不倦手訂周易尋源四卷

張廷鏡號第蓉道光乙酉優貢歷署祁陽邵陽新化訓導博學能文端謹嗜義以優貢赴都廷試友人某病瘵幾殆同伴並僕逸去廷鏡獨畱視湯藥如所親友人賴以不死官新化時諸生某以事被逮廉其枉力爲昭雪出諸獄未嘗與人言以子恩濟晉贈四品

湯文偲號璞園以孝友稱習法家言乾嘉閒苗疆用兵偲從按察使傅鼐襄定三廳屯政以功敘布理問尋館首郡爲當道倚重育嬰普濟同善三堂章程多所規畫寶南錢局積弊亦剔抉無遺性喜施予見義必爲建宗祠贍族鄰有古君子風以孫聘珍晉贈二品

黃友昺號京園偶儻不羈善作窠曰大字篤於孝友昆季閒



有無相通不計財產教子嚴而有法長子維章舉人官知縣次在煥庠生敘知縣次維德縣丞

湯 彝號幼村性沈毅究心經濟曾佐盧厚山制軍剿平猺逆復與陶雲汀宮保籌改票鹽清除積弊嗣佐裕餘山制府平通城賊晚歸里於省西北隅構槃澗園與諸名宿題詠其中著有盾墨二卷知無涯齋稿咫聞隨筆陽秋臺寇紀略柚村詩集三才輯要待梓

湯 蟻號浯菴幼秉異質篤孝友與仲季並工詩古文詞精繪事文章學問推重一時著有大學中庸說寄欣堂詩集餐玉詞以子守重贈封四品

黃友度號波亭邑諸生世居長沙授徒五十餘年文章本於

行誼晚卜築隱珠山自號礪汀老人教學不倦壽七十七歲晉贈四品子四簋臣舉人武岡學正五品銜錫彤編修授御史錫紱光祿寺署正錫燾舉人兵部員外郎

鄒本正號履元少力學篤友愛歲荒出穀平糶咸豐壬子粵逆犯境索金三百兩正喻以義不與將縱火忽一賊識之相率去先是沿江大水正出穀賑濟存活甚眾故獲此報時土盜蜂起出穀安集鄉閭孫曾多人庠食餼

葛之鏞號耦笙優廩生道光壬午舉人由大挑補直隸新城長垣知縣值長垣旱發穀捐賑飢民得甦者數千戶調清苑值繁難清理積案至六百餘起先是藩署有書吏把持公事同官多下之鏞至因控案繩以法強豪斂迹咸豐二年陞冀



州直隸州捐貲倡修書院設立條規籌膏火士風益振旋授四川夔州府知府義倉義塾盜源弊政次第興除擢成綿兵備道接見僚屬諄諄以廉明相勗勉常曰居官不明則無心之枉法必多不廉則有心之枉法尤多屬僚多化之

張廷鏞號薊穀歲貢生候選訓導援例轉內閣中書篤內行事親能得其歡仲兄兩弟早逝撫孤姪如己出嗜古日手一編不輟喜飲善談古今事性伉直嘗面折人過人咸敬服之治家約而勇於爲義妻弟某從征粵西陣歿有母年老秘不敢告歲爲某書楮以金致其家以慰其母他戚鄙貧乏尤多調恤焉子恩澧恩貢生

勞崇光號辛階道光乙酉拔貢中本科舉人壬辰進士授編

修典河南湖北鄉試京察一等山西平陽知府調太原知府擢冀甯道陞廣西按察使兼署布政使 冊封越南國王使差旋遷湖北布政使會辦楚粵軍務 賞戴花翎頭品頂戴擢廣西巡撫兼廣西提督代理廣西學政調廣東巡撫陞兩廣總督兼鹽政粵海關督旋補授雲貴總督其赴兩廣督任也時洋人躑踞省城片帆單騎疾馳而入洋人隊迎遵率退出任雲貴總督時省城爲回匪所踞單騎直入回人先震其名深相憚服外任二十五年績著廣西最盛廣西建專祠雲貴入名宦生平廉潔好義除捐廉濟公外梓鄉義舉知無不爲咸豐二年賊犯湖南命子文翺募勇守城又從廣西募勇赴楚協剿口糧器械皆自備同治四年倡修學宮兼捐卷費



善化縣志 卷之二十四  
甚鉅著有藤花吟館時文詩賦易圖詳說常惺惺齋古文詩  
稿同治丁卯薨於任

上諭褒嘉老成練達沈毅有爲賞加太子太保銜賜祭葬謚文毅  
入祀鄉賢子文翹文翬輔芝文鷗孫啟捷啟僖俱奉

旨吏部帶領引見皆由本職加恩超擢

黃士紱號拔五性嚴正遇紛難輒慷慨辨決里中黠猾憚之  
輕財急公教子義方子友隸友篤孫錫琮坤炎均庠生

黃維重號道三太學生候選刑部司獄績學能文誠篤爽直  
遇人紛爭剖陳利害期必釋乃已里人德之著有周易象占  
三禮考正子式胡登賢書

黃維同號笠屨究心經學工詩古文詞主講瀋陽士風丕變

中道光乙酉舉人壬辰進士官浙江宣平等縣興利除弊卓  
著政聲任定海外夷憚服邊徼安堵任浦江值大旱仿古荒  
政法平糶請賑全活數萬去任時百姓知其清貧斂金以贈  
力辭不獲遂置爲學校經費政績多詳浙江宣平縣志浦陽  
德政碑以老乞歸家無餘財一室圖書怡然自得著有蟾園  
詩文制藝子滌之進士吏部員外郎

甯昌炯從九職賦性孝友立品端方解紛恤寡爲鄉鄰所敬  
服子啟沃能承父志慷慨好施訓子授徒俱崇品學父子均  
以壽終炯孫國賓五品銜浙江補用府經歷任瑞安縣丞輝  
鉞以廩生中同治壬戌舉人國士從九職

黃玉甫號廷仕郡增生性端慤爲文力宗先正授徒三十餘



善化縣志 卷之二十四  
年以主敬存誠爲本壽八十九子孝宣孝安均從九職宣懔慨有俠氣里中奸猾多被懲創安性渾厚率子孫旦耕暮讀嘗有鄰人盜山木覺之潛遣之去不以白諸人戚友或負金不償終不索也後起彬彬世濟美焉

唐方煥號蔚齋候選州同積學未遇以孝友稱子啟瑛歷任廣東佛山瓊州連山南隩同知捕盜有功軍民愛戴事載潮州府志煥以子貴贈四品封孫鯤湖北府經歷

唐方煜號慎齋太學生聰穎嗜學舉業規橛名家不屑時趨奉親孝養存心仁厚凡推解之事無不力行持躬端正不蹈微逐之習子啟綬理問職啟璧運同銜啟垠啟垓均候選布理問

唐方燮號儒堂州同加級四品封職力承先業生平無一拂意事道光年間湖北沔陽監利一帶水災難民以長沙爲逃荒淵藪至則闐闐喧闐市肆幾難安業燮與鄉人士請於縣府倡捐籌賑逐日親赴賑廠監施米粥錢藥全活無數至本地重修府縣學宮移建城南書院修復省會城垣籌備儲荒穀石以及經管義渡捐修鄉村橋梁諸事靡不倡捐鉅款盡力圖維孫曾蔚起晉贈二品

唐方煦號育菴嘉慶癸酉拔貢朝考一等七品小京官道光壬午順天舉人戶部主事京察記名授江西吉安府知府調建昌府知府安徽潁州府知府居官清勤慈愼任京職時倡建善化會館捐公車費置有田畝善舉甚多晉封二品子澍



林庠生訓導五品銜際盛湖北按察使啟珍江西景德鎮同知卒於任卓有循聲商民感戴啟珏舉人候選同知

張懿績號太常庠生性倜儻好施與排難解紛鄉人稱善尤喜引誘後進教育多方子湘本潮本孫祖善曾孫元麟俱列膠庠

楊鏡清號竹師歲貢生銓選訓導敦品力學以詩古文詞名於時理學尤邃孫曾輩均有聲庠序孫承毅曾孫永年名尤卓卓著有吹又生草詩文集以孫承敘貤贈五品

張家光增生居貧力學品潔行方以弟敬修貤封四品子熙運藍翎訓導

張敬修號雨農孝友性成居喪廬墓三年兄有廢疾終身謹

事之中道光戊子舉人乙未進士官刑部精聽斷平反山東牽連盜案孫氏謀殺孀姑鉅案每案獄以罪有可比擬而得生及求其生而不得者憂喜至形言色捐廉創立都中洋痘局至今賴之庚戌丁母憂尋丁父憂服闋不起足不入城市者二十年平居寡言笑躬節儉見義勇爲粵寇薄城著守戰方略上之當事保衛桑梓著有張氏八種知本集史論經解各書入祀鄉賢子鑄瑞祁陽教諭五品銜錦瑞舉人江蘇知府鎔瑞順天副榜本省舉人國子監學正學錄孫鼎蘇光緒丙子舉人

黃維章號雲荃道光戊子舉人大挑知縣因親老改教選衡郡訓導於地方有關風化事無不舉行咸豐辛亥賊由粵西



入全州衡係鄰境上憲委查奸匪兼招集鄉勇以遏賊衝保陞廣西雒容知縣委辦審局鞠讞詳慎多所矜全

易 棠號念園原浙籍占籍善化弱冠遊庠旋食餼道光戊子鄉舉己丑進士授刑部主事總辦秋審四次差赴各省查讞疑獄及海塘河防江防遷郎中授廣東廣州知府護督糧道咸豐改元陞陝西按察使調甘肅按察使補甘肅布政使陞山西巡撫旋擢陝甘總督六年丙辰因病假歸卒年七十照尚書例議卹棠歷官謙謹平恕務崇大體至建牙秦中總制全陝竭慮益周捐助軍餉援案奏廣善化文武學額二名著有四書典制考略貽芬書屋詩文集子心炳候選同知劉朝燦太學生性渾厚好義急公省中重大公事如修府學

宮城南書院及大西門義渡靡不踴躍爭先道光辛卯癸巳下游水災荒民載道朝燦偕諸紳設廠賑饑全活無算以子溥由副榜選新田教諭加知州銜贈五品封

章敬恕號恪莊理問銜性端慤凡天文象緯青烏岐黃之術靡不通曉喜談易終日手一卷習靜不輕出以田宅授諸子弟而自往來其閒與客對坐和藹如春隆冬不裘神彩內斂壽九十晉五品封

鄒立英號俊卿庠生性孝友妻郭氏四十三卒英以母陳恭人年高不再娶侍寢息者十餘年母年八十時減佃租千餘石爲母壽治家嚴而有法內外六十餘人聽命雍肅析居時兄弟俱白髮皤然握手泣涕不忍別捐義渡田三十畝捐族



祠田三十畝約已厚人鄉里信服晉四品封子五之藻之翰均甲午舉人之黼六品附貢生壽璋浙江同知知府銜壽祺例貢生孫倬雲兆遴兆芾俱庠生

侯開創號大業國學生謙抑節儉立品端方早歲失恃事父以孝邑中義舉捐輸不惜子孫科名蔚起

鄒立鶴號松齡通經史精數學家居儉約喜周急道光己酉荒出粟助賑咸豐壬子粵匪犯省土寇焚劫鶴集鄰里曉以大義地境以安寺觀宗祠族譜渡橋多所捐修以子蔭府經歷贈修職郎

黃維善號書田以縣首補弟子員慷慨好義歲辛卯就聘華容值水災議賑幕友中堅以奉大憲批准爲詞維善曰余書生不知律例顧災黎待哺難緩須臾果能立救民命卽因公獲咎何憾當事感其言立命開倉賑之全活數萬偶至鄉有貧民鬻其妻者哭甚哀悉以所得館金給之初艱嗣中年舉丈夫子七式度舉於鄉式庠式雍暨孫仁黼仁濟均入庠諸子多登仕籍人以爲報施不爽云

張倬思號甫田國學生勤學勵品兄弟七人皓首同居雙老在堂眼觀五代一時天倫之樂罕能及者晚益力承先德培植後起督修祠譜捐置祀田地方義舉知無不爲壽八十贈封五品子先捷舉人先掄恩貢光署正敘五品銜

蕭譜彬號藻庭道光辛卯舉人以大挑授城步教諭陞承順府教授由軍功保同知銜幼遵庭訓敦品勵學造士有方子



繼彰孫秉仁曾孫昌世俱邑庠

章俊雅俊拔同懷兄弟俊雅號正菴以郡首入庠食餼中道光辛卯舉人挑國史館謄錄截取知縣改授綏甯教諭未任爲人貌清氣腴手不釋卷通算法及天文諸書待子姪族鄰間嚴而有法子瑞梓庠生雲緞候選縣丞俊拔號萃堂以優廩中道光己亥舉人外和中直見人有不法事卽詞禁之粵逆竄省時力行團練境賴以安

張濬思號雨泉少承庭訓博覽經史早歲食餼工詩古文詞謙厚和易善解紛爭晚以明經館於鄉訓課生徒嚴整有法家庭孝友兼盡父汝顯官寶慶教授適有逋負濬以館穀償之不以累弟姪壽八十著有詩文待梓子七列鬻序貢成均

膺選職皆克承先志

章俊哲號作堂庠生居鄉善排解中表親有年邁五十不能娶者延之家爲之娶妻育子有母黨於父在時以田契押銀後母子相權累至千金哲檢還之無德色子三瑞應歲貢莢瑞兆孫靖俱庠生

彭遇友性孝友理家無私蓄族黨有紛爭數言排解輒服居平好學耽吟咏訓兒輩聯云要從孝弟爲堯舜莫僅文章學柳韓壽八十四以子焯貴晉贈二品

張先駿號蘭雲學博九思子承家學遵古誼不逐時趨童試以縣府冠軍入庠端方孝友詩文字推重一時授教蒙泉草堂成就多士著有雲香詩文集行世子澤瓊庠生品學有父



風以曾孫星元貴晉一品封

黃 凱山西遼州巡檢邑有疑難紛爭呈訴者立爲判釋升縣佐以勞卒於官子五季兆昇出嗣弟友壬以總兵借補青州參將馳贈振威將軍

張 紳號書堂與兄丙弟朋庚時獲俱有聲庠序績學勵品研究經史性理諸書切磨質正道光壬辰與同學纂輯經史子集有關風化者分類梓行以示勸懲紳中是科亞魁子家槐進士河南知縣

張 璵號箬村廣東總兵文宏元孫弱冠入庠旋食餼學術深邃遠近爭致館穀師範肅然孝事繼母沒後哀慕終身著有詩文輯略課徒草簡易編春秋左傳讀本歷代帝王紀略

心經解待梓結廬穹山以明經老學者稱箬村先生

徐 昂廩生嗜古力學爲羅慎齋山長所器重時藝多入選姪篤敬庠生聰穎博識傲岸不羣有薦以美館者囑先謁之不屑也以諸生終

王開炳開琳同懷兄弟炳附貢生因母多病遂習醫求診者踵至晝夜寒暑不少懈修祠建社倉辦理妥善壽八十二琳從九職性勤儉手創萬金語人口吾之理財因天地自然之利非分者私毫不干庶能貽後長守乎以壽終子五長子雲湘按經歷銜

周又辭太學生慷慨仗義倡建安福社倉遇年荒平價減糶邑之滌灣市漁灣市枯石塘炭塘等處義渡諸多與力焉



龔律鍾歲貢生性渾樸與人交無城府弟析箸後家窘復召之同居垂老如少年爲文雄渾學者多師法之

徐 榮號信泉弟棠號星城鳳藻號樵笙同懷兄弟父濬以知縣需次中州沒於官榮時十二歲奉母偕兩弟護喪歸孝友兼盡援例以知縣分發江西讞獄多平反攝蓮花廳理積年巨案以母老乞養歸慷慨樂施子有負其重費難償者更給金使爲後圖卒年六十八棠幼卽英特於書無所不窺援例候銓縣丞練習政務地方大吏相倚重道光己丑佐岳州人粵賊犯長沙瀏陽徵義堂匪爲內應商於巡撫張亮基檄江忠烈迅往剿除之以勞績晉鹽提舉銜母沒哀毀盡禮以

子元燮晉三品封鳳藻邑增生嗜學敦品道光癸卯舉人官衡山訓導

張先捷號邃航四歲入塾穎悟過人文辭清麗十九入庠補增生博學希古不規規時藝道光癸卯領鄉舉居恆篤孝友崇信義時以祖墓涉訟私解囊金以全族誼晚閉戶家居究心經義不聞外事一鄉稱善

裴大護號玉田歲貢生性和易家貧績學硯田自給束脩之外不名一錢晚年益靜逸方巾袍幅遇親故引與立談娓娓不倦有隱君子風

張進思號秀升讀書敦品一庭雍穆任卹鄉閭子先烈端介有父風孫曾俱邑庠



張先翼號梅村庠生明經敏思子家學淵源行修品潔課徒必遵禮法居平言笑不苟脩脯之外一介不取諸人四壁蕭然泊如也著有雪香詩文集

郭祖翼號芑泉廩生昆甫先達曾孫家貧好讀博通古今立身制行力追古人交遊皆一時名宿著有兩福山房詩文集子炳莖郡庠生

言尚杰邑庠生立品高潔與人無忤雖悍夫聞其言輒化人以王彥方目之爲諸生試輒高等課生徒數十年門下多知名士子揚道光己亥舉人少承庭訓時藝力宗先輩當粵匪肆擾人心疑畏倡率鄉里築堡練勇遠近以安曾文正稱其膽識選教諭未任卒次子昌庠生博古勤學廉介自守善岐

黃術精風鑑凡地方公事及修理橋廟皆與力焉壽七十八  
孫嘉龍甲兆馨俱邑庠

劉元基國學生輕財重義道光二十八年捐六都地名楊家衝田四十畝入府學宮以裕歲修倡建宗祠捐祭產義學共田百餘畝捐齋公坡山屋作地方義山壽八十六

劉佑榜性忠厚道光八年捐六都地名挽角子田三十畝入嶽麓書院佐膏火又捐窰頭上田一百四十畝入縣學奉旌建坊

張國賢太學生性剛正有幹才倡修同善堂施衣藥棺木窮民賴之復重修府學宮增置樂舞祀典大備諸生習禮罔弗以與祭爲榮道光辛卯癸巳下游水災倡設賑廠全活甚眾



邑中善舉靡不踴躍爭先以子作霖贈四品封  
賀桂齡號丹麓長齡熙齡同懷兄弟道光壬午優貢補巴陵  
教諭癸卯舉於鄉丁未成進士以卽用分發廣東補潮陽縣  
知縣權潮州府通判以平清遠賊功擢同知性端介仕於侈  
靡之鄉不以纖毫自潤生平嗜學不倦伯仲之間日以躬行  
實踐相切劘詩古文詞力追晉魏士林推重著有古今體詩  
文若干卷待梓子孫紹衣先德名噪膠庠

陳倬元號莆田國學生敦品嗜學性篤謹不苟言動躬行節  
約凡省中善舉無不竭力資助粵匪犯順以來捐輸城工軍  
餉先後以數千計尤見深明大義壽七十晉二品封子六開  
濬運同銜象賢附貢同知銜開瑞綏甯訓導開萼藍翎六品  
銜鹽運司知事開埇國子監典籍開熠光祿寺署正孫多有  
聲庠序

郭 燠號北威幼孤力學甫冠入庠旋貢成均胞兄煒捐職  
遊宦病歸負債近千金燠代賠償兄沒撫姪成立分給已田  
五十畝鄉里稱之

鄒立志號大展太學生慷慨好義捐置宗祠祀田以子續長  
兄嗣析產惟均鄰里耕種嘗假貲本有因而饒裕者商賈負  
重債焚券不計

湯銘新號雪盤優廩生性剛正解紛排難無稍徇族中孤貧  
多寄託焉晚精醫術貧者並給藥資詩酒自娛延師訓後子  
宗悅號麓泉太學生敦品勵學廉直有父風尤篤公務清復



馮介烈公墓及其故宅主同仁堂事公置廣濟倉汰除習弊以所餘兼行眾善鄉里德之敘州同銜孫應斗郡庠生

劉光蒼理問職性謹厚不喜聞人過尤急公好義咸豐壬子髮匪竄長沙居地當其衝立鄉團備守禦賊退曾相國檄辦

鄉團費約千金均已出以子金垣金墉貴晉贈二品

蕭寅顯號仲虎庠生學宗宋五子手錄古名臣言行有關政治者百餘卷尤邃於易自漢以下講易諸家無不詳覽祛支離之說著易象闡微五卷大易圖解一卷卒年七十

鄒立煜號鏡湖幼聰慧曾詠武陵白桃花百韻中有秦時明月無今古晉代浮雲任去留之句城南山長賀見之曰此逸才也但恐不壽耳年二十三卒士林惜之著有醉經堂時文

玩香亭詩集子雲璈廩貢生

王 豐庠生事繼母曲盡子道家初饒稱貸不吝貧不能償者聚券焚之客託有購吉兆者袖重金事成悉返其餘著有課心錄補雲軒文稿地理衣鉢諸書夫婦壽逾大耋子開宗庠生

杜程萬號子靜太學生性敦樸篤孝友父年老患痰嗽竟夜不安寐躬親侍養衣不解帶者二年伯兄蚤卒遺孤嘉穀愛逾己子教之讀入邑庠晚年益自謹飭日取先儒語錄焚香盥誦以資自警子家鏞家鈞俱歲貢生候選訓導孫寶聯庠生浙江候補府經歷煥聯庠生

何 湘號砥三負性剛直非義不苟時筦攝庫事吏事餘閒



書卷不釋尤樂與人爲善地方公事必捐貲贊成壽逾大耄  
五代同堂曾元科名繼起以孫近思馳贈五品

王然簡號可亭庠生性嚴正嘗失館友憐其窘欲與共營非  
分財怒斥之讀書嶽城書院每春秋與祭得胙必貽父母自  
甘蔬菲致感同儕餽助承歡友人某未及禫欲應試然簡正  
色責之其人悔悟後爲名宦爲文力追先正設教多所成就  
子篤斐官江西贈徵仕郎

易南湖號交如例貢生秉性剛方篤摯倡修譜牒族有祖山  
爲大姓侵墮累訟經年湘獨力呈請大憲得清復居鄉排難  
解紛令人悅服壽七十五子華肇能繼父志每歲租穀必留  
以備地方緩急荒年平價減糶救嬰保息義舉甚多孫恢緒

從九請封雲從太學生體仁邑庠生

張澤漢號東湖庠生端品力學爲文必規先正性友愛姊適  
王家貧守節時以所得脩金分潤之俾撫孤成立壽九十四  
子臨遠邑庠孫曾皆以詩禮傳

何鏡遠原名憲遠號雲喬少年食餼力學窮經性情簡樸不  
事浮華家居授徒多所成就道光庚戌恩貢候選直隸州州  
判壽八十四子家彥郡庠生

王達四理問街好行善事懸育嬰勸帖於門諭同井同族家  
貧養女者投報助錢全活甚眾倡施棺木修同人亦允二橋  
地方私宰賭博遵例嚴禁鄉里化之孫作人樹人定魁均邑  
庠生



黃雲鵬號漢卿雲驤號漢臣少承家學髫年應試輒冠軍兄弟先後入庠驤旋食餼專心經史爲文勃勃如釜上氣孝友性成家貧守素不預外事幕遊得館金兄弟推用無少恡喜賓友談讌飲饌必豐橐無餘貲澹如也

張祖嵩號螺峯敦品力學隱居長沙天井峯下好種菊一時名下士相與唱和壽八十著有天井山房詩文集

張鴻本歲貢生制行端方授徒無智愚反覆詳盡族戚急難竭力營護孫芹澤秉性寬厚幼失怙恃友愛諸弟分貲讓產篤宗誼恤貧難里黨交稱芹子耀魁熙元榮治皆邑庠

楊達尊號兼三候選縣丞性慷慨幼擁家資遇戚友貧乏者無不助之中年家耗託申韓爲業道光甲申應縣侯丁薌溪

聘爲母氏狄請旌時教諭適其舅兄方伯疇商以節孝祠牌位有年久失考者搜羅得實遂捐貲建立總牌筠操幽光賴永馨薦子光站附貢中書科中書孫開第進士浙江知縣譚國光號玉樵博通經史工詩古駢體道光元年許萊山學使試取古學稱爲南省才人以廩生中道光甲午舉人授芷江訓導著有師竹山房文集

譚家垣號湘芷爽直敦篤家赤貧父母兄弟二十餘口俱仰食於垣每歲館金無幾毫不屑於非分之求由廩生中道光甲午舉人曾文正重其耿介時存恤其家

鄒之藻之黼壽璋同懷兄弟藻字麗堂以郡增生中道光甲午副榜任瀘溪教諭日與諸生論學談文不倦任滿假歸築



善化縣志 卷之二十四  
怡雲別墅讀書種竹以自娛善排解樂施與以壽終子兆遴  
郡庠生之黼附貢生字範吾性孝友年七十以外猶手不釋  
卷子孫繁衍壽璋字嶽屏監生具瞻識咸豐三年曾侍郎委  
帶湘勇得軍心剿賊瀕死者再以勞敘主簿五年假歸巡撫  
駱秉章委帶湘潭水師敘州同加同知銜同治元年浙江巡  
撫左宗棠奏調隨營辦事以同知畱浙補用浙江肅清加知  
府銜因勞卒於官褒忠錄有傳子謙道國子監典籍銜

孫鼎臣頤臣觀臣同懷兄弟鼎臣號芝房氣度溫雅中道光  
乙未舉人考取內閣中書旋成進士授編修乙酉典試黔中  
由翰詹擢侍讀時粵盜肆擾疏陳團練籌餉事宜最悉琦善  
以前督釋自黑龍江署河南巡撫疏劾不足復用明年賊擾

河北賽尚阿徐廣縉以前督出監赴軍自效復劾其失律用  
之無以申軍法假歸主講城南成畚塘芻論河防紀略蒼筤  
詩集文集頤臣號仲嘉中道光丙午鄉科成進士分兵部職  
方司在部曹時講求天下阨塞形勢暨史館掌故文獻鉅典  
著聽香閣劄記觀臣號叔孚咸豐辛亥順天舉人孝事孀母  
家雖貧養無不贍鼎臣子長宗錫次宗穀均光緒丁丑翰林  
三宗幹頤臣子宗恆觀臣子宗海均有聲庠序

謝光煦號春庭道光乙未副榜肄業城南經學古文爲當道  
所賞識生平廉介自持家貧授徒精心講貫成就多人授永  
順教諭

黃仁政號治棠道光乙未舉人歷任衡州常甯教諭勦土匪



有功保知縣加運同銜性豪逸著有熙春閣詩草

俞理枝號密垣優廩生慷慨負奇氣尤肆力於古文由廩生  
中道光戊子舉人主講郴衡東山石鼓書院造就多士以大  
挑授興甯訓導捐廉立課創報節孝歲飢力請縣令糴賑多  
所全活母許夫人九十時病風痺理枝率妻彭氏跪哺飲食  
事奉維謹孝稱鄉族子錫汝即選道錫桓訓導錫椿舉人  
陳賜元號春齋州同職總角時即能盡人子禮父母有疾衣  
不解帶父母沒哀毀骨立祭奠哀敬終身兄弟析居後仍合  
爨垂十年弟應元早世撫遺孤熙成立他如學宮義渡同善  
堂及歲荒辦賑各善舉無不捐貲贊餉子孫多列膠庠  
黃誠兆麟同懷兄弟誠號月巖幼承庭訓授書早舉十三

經績學不售習法家言隨舅氏唐太常鑑臬藩署中襄辦政  
務性擢節一裘數十年著有晚香書室雜存一卷客游紀程  
四卷兆麟號黻卿拔貢與弟倬同中鄉科聯捷成進士授編  
修一時有宋氏郊祁之目為人端凝和厚自江南道御史遷  
刑禮給事中至光祿少卿數上書條奏保甲團練見之施行  
江華李元發倡亂大吏督師坐失機宜抗章入告不避權貴  
分校順天鄉試主福建鄉試洎諸繁鉅差使所至有聲誠子  
膺登賢書應泰四川知縣應昌廣東通判麟子榮綬庠生國  
子監典簿洪運庠生直隸知縣訓埴州同銜候選經歷  
唐翥號雲槎邑庠生援例補光祿寺署正聞母病乞歸侍  
湯藥嚴冬終夜不解帶者十年父方變晚年亦多病翥承歡



膝下依依如穉子藥必親嘗食必省視生養死哀鄰里欽感處兄弟篤友于訓兒孫一準義方時以格言相規誠己酉湖北奇荒難民雲集省垣翥偕鄉里經辦賑務按日赴城外賑廠監同施發以勞致疾卒晉贈二品子樹森浙江道署臬司樹楠舉人陝西道監察御史孫福恆浙江運副使知府銜贊袞舉人

周輯瑞號子佩先世由浙來楚隸籍善化補諸生道光己亥舉人乙巳進士授吏部考功司咸豐元年內艱回籍督辦捐輸團練服闋補文選司員外郎記名御史同治元年京察記名以道府用選郎中赴河南查辦事件調補江蘇鎮江府知府生平厚重溫和尤篤孝友都居養母甚得歡心居部曹時

畱心經濟鎮江當髮賊蹂躪地方凋敝蒞任後加意撫綏以勞卒於任

譚國秉號星垣太學生性豪邁文筆清健工大小隸篆屢躋名場晚以詩酒自娛潛心課讀壽逾七十子世鈺庠生世麒同治壬戌舉人

吳韞玉號謹堂習錢幕遊浙閩旋楚施棺以濟貧者同善育嬰各義舉均竭力捐助子渥棠從九職生平名利俱澹友某負債難償焚券數百金以棠子紱榮官江西均贈封五品龔金田號筆廬太學生嗜古能詩文居喪遵家禮不尚浮屠倡置祀田族有孤貧者養於家子弟能自立者或讀書或習藝出貲成就之施棺木置義山遇荒歉助賑施藥訓子孫以



善化縣志 卷之二十四  
敦品力學爲務壽七十八夫婦偕老卒時呼子孫至前書楹聯訖飲酒端坐而逝

凌玉城號子軒道光庚子舉人聰穎過人博通經史弟玉垣號荻舟道光丁酉拔貢考授七品小京官己亥本省舉人由屯田司主事考取軍機記名軍機處行走具有異才詞章立就唯豪邁不羈詩酒放佚同鄉曾文正深愛其才屢相規切冀其大用惜未踰艾而卒

譚榮祺號則堯勤儉篤實建祠宇輯家乘嘉慶間創修暮雲驛河岸碼頭及白廟嘴一帶石路至今行人稱便臨終囑家人焚借券孫曾多列膠庠

皮登樂號智洲太學生由江右遷湖南占籍善化勤儉起家視躬方正治家嚴肅於修橋梁設津渡助婚喪施棺藥費無所吝吳江水災齎金往救全活多人壽八十三贈封五品郭尊鑿號芸廬庠生父類書弱冠補弟子員早逝鑿甫八齡母病侍湯藥衣不解帶兄先卒撫四齡孤姪成立始析產倡建義倉備荒歉有紛爭不釋者出貲排解貧不能葬者給棺地冬月施寒衣鄉中義舉多仗助焉

劉朝鼎號春臺廩貢生試用訓導父彬大挑知縣令海陽歿於任鼎哀號屏饋粥聲綴氣微母撼榻呼曰朝鼎我在汝烏敢死憬然甦扶櫬歸葬謹事母母病侍湯藥晝夜睫不交母歿治喪以禮殯日扶杖泣送殯所伏不起淚盈眶聲禁子哀呼忽甦子言父勞矣張目曰母字吾寒暑未離懷抱今敢言



勞耶遂歸而卒子鏡瀄郡增生

夏家鼎家泰家豫家疇同懷兄弟家鼎原名顧號謔吾道光  
庚子經魁由景山官學教習授直隸永平縣兼臨洺關同知  
調補安平加同知直隸州剔除弊政吏畏民懷子聲本鹽知  
事聲律進士候補道聲臚附貢鹽大使聲鏞鹽大使聲鏗訓  
導家泰號階平性肫樸道光丁酉經魁乙巳進士吏部主事  
辦理昌平團練遷郎中補坐糧廳漢監督授福建延津邵道  
署按察使其在吏部勤慎銓選團練昌平規仿古法陳臬閩  
中訊鞫明允子聲誠聲普附貢錫齡庠生家豫號藩垣和平  
敦篤績學不遇以山水詩酒書畫自娛清談娓娓令人情移  
軍功五品銜家疇原名家升號雲津道光癸卯舉人咸豐壬

子進士分發雲南權廣通縣事署武定州知州擢同知權楚  
雄知府調迤西迤南兵備道時滇回蠢動練軍集餉以積勞  
卒任所著有橘西詩文集子聲瀚州判聲窩候選從九聲漣  
候選同知

韓文禮號敬亭歲貢澤遠之曾孫庠生植之孫伯兄季弟俱  
早逝無遺貲諸姪穉弱文禮撫如己子教育不倦待其成立  
以手創之業分給之又捐河西都田數十畝資嶽城兩院膏  
火道光己酉歲大饑捐粥賑荒全活甚眾自奉儉薄日手一  
編以讀書課子爲事長子俊虞貢候選員外郎改名炳章光  
緒丙子舉人次倬以府首入泮

潘 誠號葆真先籍貴州祖在渭乾隆庚辰舉人官黎平教



諭遷長沙府經歷權安化縣事父雲普隨侍長沙生誠聰明敦篤習法家言爲大府所推重南省寶南錢局多積弊太守河南倉公廉其賢兩任均倚託焉性孝友生養死事無毫髮憾尤精岐黃術多活人著喉科心法編行世占籍善化卒年六十七子兆松同知榮綬從九宗壽拔貢中式成進士候補廣西知府啟賢庠生候選光署正孫佑純郡庠

張嗣鎮號國重生有至性讀書洞了大義父疾私禱減年益算居喪哀敬備至躬親負土植檜孺慕終身性嚴正勤樸起家一鄉矜式道光戊申己酉大饑減糶賑貸多所全活自粵寇起倡義團練以功敘六品銜咸豐二年冬賊大隊掩至火其廬子世信世恭孫惟倅惟修塾師梁選吾練長黃黼朝同

日格斃嗣鎮因傷自分難生遺命捐田伯什晦入族祠遂溘逝世信婦楊氏亦哀毀旋卒一家死者八人明年曾文正督辦團防手書忠義之門扁額表其閭輓以聯云湘水照清徽八口捐生精魂欲傍蔡忠烈睢陽潮祖德一門殉難賓從更憐南霽雲事聞 賜卹入祀表忠祠孫曾累葉同爨入廳入泮者多人惟雋成進士吏部員外郎

張嗣誥號雅量監生性慈惠里中有夫婦仳離者資以財俾完其配家僅中產修創橋道諸義舉不辭勞費歲歉蠲租減糶補救多方子世祥世福等體父志捐田百四十畝入祠熊啟文號會友秉性端方家頗饒好行善事鄉黨賴之居家訓子有方壽七十三子芳英國學生孫海清州同職曾孫錫



祺按經歷

熊啟賢號繼禹性穎異幼承家學善屬文屢試不遇居家孝友備摯捐修橋路不吝貲忠厚傳家詩書裕後壽七十八孫聲澧景岷俱廩庠

章瑞醴號秭農道光己亥舉人品行端方廣西寇起上游倚重以勞績保知府加道銜卒於籌餉捐局中丞王贈南州坊表四字以旌之子運如庠生

熊啟壽號靜軒廩生道光丙午舉人咸豐壬子粵逆犯省守城出力敘知縣加同知銜秉性仁厚與人無疾言遽色工詩文詞授徒多所造就取與不苟子世昌拔貢同知銜武岡訓導家筠庠生瑞昌登賢書孫銘恩鹽大使

王文煊布衣士也家小康自甘淡泊爲兄弟戚友推讓賠累幾至空乏不少悔好讀書貧不能讀者爲延師課之壽七十六子鎮湘增生孫兆麟候選從九

熊達善侑生性孝友家貧苦學博通經史授徒有方訾笑不苟鄉黨稱爲人師壽八十一貽贈承德郎

張祖純國學生績學砥行忠厚耿介見貧乏親鄰竭力拯濟生平不道人過子達澤六品職少孤體母訓力學好義族戚急難多方救解投筆從戎適武岡同人某患疫垂危人皆避之達獨同寢處籌醫藥某得瘳一生隱德多類此達子炳麟歲貢孫琛運庠生

鄒而謙監生攻苦力學先是謙父與他省行商通貨賄有船



商負債多金負者欲謙往取謙曰細故耳吾不以是區區者荒吾業也性孝友兄出繼無恆產以產業均之子兆瑛庠生以孫梧生捐職贈五品封

黃澍國號雨亭歲貢家貧竭力奉親顏其堂曰愛日以自惕勵雖窘迫不苟取讀書終身雜著甚富文有先正風

毛大彥廩生篤孝友母年高曲意承歡諸兄好尚各殊彥事之惟謹一言一動不敢踰禮教授生徒諄諄以恂謹篤實爲先務

許如駿號次蘇性豪邁聰穎絕倫道光甲辰舉人咸豐癸丑大挑以知縣籤掣南河署鹽城縣事丁母艱奏畱江北糧臺出力洊保至道員花翎加鹽運使銜權兩淮鹽運印務累保加布政使銜以勞卒於揚州公廨其在南河也值江省軍興清淮戒嚴如駿委辦籌防民情安謐鹽城任內勤求地方利弊廉明慈愼卓著循聲嗣接辦南北糧臺全餉全軍厥功甚偉諸當事特倚重之

侯劭基號吉甫國學六品軍功邑中籌餉團練以及鄉里修橋廟恤孤貧無不與力居家布衣粒食古樸可風壽八十一弟樹鵠號雲昆庠生敦品勵學咸豐初元邑紳公舉孝廉方正固卻之晚年閉戶讀書捐金獨修洞門嶺崎嶇山道行者便之孫藻庠生家瓚武舉家珍庠生

許寶珩庠名又珩道光己酉舉人知廣東饒平縣時髮逆陷永定募兵籌餉嚴爲備禦城得安堵旋署潮陽新會補授瓊



山縣地多煙瘴久旱祈禱甘霖大沛修學舍籌膏火教養兼備調補番禺案牘鱗集剖決如流辛酉庚午充廣東鄉試同考官加同知銜

文常迴號式昭廩貢生品行端方嗜古力學授徒多成就著有周易參考行世書香繼起

黃覺國增生三歲失恃事季母以孝於昆季尤篤友愛平居寡言笑慎取與非應試不履城市讀書至老不倦子曷堃運元均庠生

郭秀書號景成生有至性家小康好施濟娶妻黃氏有淑德生一子尊端甫周齡黃氏物故時秀書年二十三歲不再娶以子尊端按照磨銜貤贈登仕郎

羅運珍號楚城庠生早失怙撫諸弟成立事母以孝好義恤貧鄉里爭端得其片言立解子洪鵠庠生

王文灼理問職孝事繼母善理財儉而能施道光己酉歲饑倡賑減糶復以墾荒供役代賑鄉無飢民嗣沔沔荒民來南以數萬計灼倡眾於通衢設局點給從厚飢民稱便境無擾累咸豐壬子髮賊過境時村民離散文灼出穀安集之附郭義塚捐貲修塚善舉甚夥夫婦先後以壽終子鼎運庠生國子監典籍

吳宗賞號德懋太學生性忼爽親友忿爭必力為勸解恤貧周急解囊弗吝橋路傾圮必董成之佃某罷耕欠租宗母蕭孺人令賊獲運已倉穀於外及宗歸指為佃納宗知之以後



凡事曲體母志先是宗賞嗣他姓子晚年得子定坦宗逝後定坦將產均分計田租三百餘石有令其少子者坦不應慷慨有父風孫森甲運鍾俱邑庠

劉世綸號錫之性慈樂善道光己酉下游水災飢民道殣相望命孫源龍助貲施棺有借貸因貧難償者焚券至于餘金城外蔡公墳自在菴一帶冢骸暴露捐貲修培壽逾大耋孫源龍州同銜候選縣丞

劉曙號霽南增生六品銜幼失怙篤志養親友于愛慤博覽羣書精風鑑道光年間修郡學宮兄彥齋爲首未竟業卒成之樂舞儀典核辦精詳己酉歲饑邑侯易屬司賑事多所全活咸豐壬子粵賊犯省辦理防堵總局歷八十餘日不少

倦兄弟五代同居贈四品封子桂森國學生積學未售潔庠生敘州牧孫彤齡彭齡頊齡俱廩庠

譚國式號少堯篤孝友兄貧病飲食湯藥代籌備至咸豐壬子粵匪由醴犯省式居東鄉見賊火焚鄰居匍匐乞救被虜令引路不從以刀脇之不屈適傳官軍至賊失措得脫人以爲善念所感子世襄廩生

周純亮號標光性樸誠事親克孝待諸弟曲盡友愛撫姪輩以恩代賄逋負數百金篤於族誼恤貧周乏以子膺選職贈五品封孫光弼建瓴俱庠生

柯光燦號弼臣國學生咸豐二年髮賊撲長沙帶勇守城賊退查團清匪重修學宮暨餉捐收嬰義舉不辭勞費選福建



邵武府經歷未就補用知縣加州銜子濬庠生訓導五品銜  
益壽廣東分司

易作勳號輔臣忠厚耿直一生無非義之取遇有以非分相  
干者正言卻之里黨紛爭得一言卽解子觀光孫宗耀均邑  
庠生

孟之英號湘山從九職性鯁直平生無欺人語睦族憐貧西  
門義渡及文昌閣文約各舉多其首倡著篤倫記以表前人  
贍族義舉

張聲正號宏甫咸豐七年以府經歷督辦湖北戰船留鄂補  
用護運軍餉升知縣署崇陽天門升用同知補棗陽修學宮  
邑乘辦防堵公正廉明輿情感洽調署應山以防剿有功加

花翎知府銜

皮存源號英譜州同五品銜仁厚敦篤歲飢出貲作糜粥施  
湯藥以資拯濟粵逆犯省捐貲修城助餉兵燹後城內外街  
石碼頭竭力獨修不居名其他省垣公事無鉅細均重金資  
助子樹棠舉人浙江知縣應奎庠生候選同知黻恩提舉銜  
孫錫瑞拔貢生

劉溥號百泉力學能文庠生道光己酉副舉人選新田訓  
導加知州銜性孝友五代同居生平不信佛老剛介敢言北  
省水災饑民上竄倡眾捐賑粵逆犯省督勇保城倡立兼善  
堂監修城工暨重建縣學宮城隍廟歲科卷費餉釐捐輸各  
鉅舉均身任不辭煩勞卒年七十二子鶚東安訓導鴻國學



偉優廩生鵠優附生

韓 森號星源慷慨好義邑中鉅舉無不踴躍從公乙丑重修學宮實襄其役宅心忠厚戚里貧乏以時周恤子開錫縣試冠軍入泮

孟 彬號紱安府試冠軍入庠母病視湯藥不解帶者八十餘日母卒哀毀盡禮以軍功選永州學訓導卒年七十二  
龔 塋號載堂邑諸生內行端謹道光初元選舉孝廉方正倡修族譜宗祠不惜費族有遺孤贍養成立給田耕種賴以不絕讀書至老不倦著有藏谷山房詩文草二十卷

張勝凡號雲萊性剛直先是勝凡所居里複嶺崇巖盜賊屯集設立團規搜捕遂盡甯邑驛旅有奪財斃命案不得正犯

連累附近居民已成定讞者七人雲萊力為呈辨雪其冤得

免死生平喜談古人嘉言懿行人多化為善子壽衡廩生

張勝爵號肇修太學生性端慤督子姪輩以詩書孝友相勸

勉洲田憂旱倡捐重金興修水利里有紛爭一經剖勸曲直

立分子宗鶚庠生

杜家鈞號右衡歲貢生倜儻權奇不隨流俗性堅介能忍人所不能忍為文力宗先正績學不倦人爭延為弟子師多所成就字遵大歐能得其意識者珍之子煥聯庠生

朱 錦號春昞道光庚子副舉人主講益陽箴言書院授永

順桑植訓導終於任學行端介諸生奉為人師撰有春昞隨

筆待梓



唐啟綬啟垠啟垓同懷兄弟均理問職加五品銜綬號若菴  
居心忠厚生平無一欺人語無一負人事道光己酉歲饑兄  
弟捐重貲設廠賑濟身任煩勞子畢賢花翎遊擊樹棻候銓  
從九孫銘鼎庠生垠號漢川端謹廉介不尙華靡待人一本  
至誠僮僕老廢者必代謀生活族戚構怨者輒曲爲排解公  
事竭慮懷清爲人倚重壽七十二四代同堂子鍾溥候銓從  
九鍾淦庠生鍾淮國子監典籍垓號杏樓性戇直遇違理事  
輒正言不諱人亦敬服治岐黃術遇有診視不辭勞不受謝  
卒年六十九

楊 揄號榮聲性敏慧善屬文絕意進取詩酒自娛尤精岐  
黃術授方多奇驗貧者贈以刀圭不計值生平喜排難解紛  
人樂從之著有覺性軒文集子志敏壽八十二孫曾振起元  
孫先彝從九職

趙立道號達菴端方誠實一生無欺人語至老手不釋卷壽  
七十五子啟南庠生立道弟璧號連城庠生性剛直全嗇恤  
孤倡修橋路不吝財長子駿選五品封職次子宗鼎邑庠孫  
榮甲理問銜

林 勣號花農郡廩生內行純篤與人交無城府父性嚴峻  
服養能得其歡心羣弟雖析居周恤備至教養諸姪如己子  
家貧入幕府言動有法甚見優禮司鐸清泉假歸猶手不釋  
卷四壁蕭然晏如也

彭純心號惺園太學生性慷慨族中有貧不能完娶者完之



有老不能自養者月計米助之死復貲葬之遇米貴歲歉減糶濟貧精岐黃術里有某某夫婦患惡瘡施丹藥調治均獲痊得延嗣人多德之孫秘廩生曾孫徵庶庠生

李厚墳號友筮增生性聰慧數月喪母稍長讀書後聞其母因產致疾每誕日不茹葷酒慘然獨坐長沙縣登考試文章聘爲總校有富人子先袖重金求首選墳正色卻之家人微聞其言叩之終不白其姓字行誼類此

皮振漢孝養純篤母年逾九十孺慕終身性端慤好施與族里翕然稱之

皮繩直幼失恃事繼母年逾七十兩目失明扶掖奉養敬愛兼篤人無閒言性方嚴博覽好學著有異齋閒吟集贈封四

品子炳舉人孫宗瀚進士授主事

陳期元號仁山庠生性孝友家庭雍睦邑中有善舉靡不首爲之倡以子同教諭五品銜贈五品封

陳源號霖川太學生道光戊申歲潦饑民麋集捐助經費辦理粥廠雖盛暑不倦清理祖塋克承先志凡地方公事及成人之美靡不踴躍爲之

張拱辰號植吾咸豐戊午舉人性篤孝母侯氏病痺晝夜扶持衣不解帶母沒廬墓山谷咸豐初會文正籌餉東征拱辰前後總理妥善先是宜臨分局屢激事端局議設勇彈壓拱辰單車往開陳利害皆讐伏而散敘五品銜選武陵教諭著有槐蔭草堂集子鴻基庠生



劉應銑號貢軒太學生性嚴正積學砥行終身手不釋卷屢列前茅事親竭力友兄弟課子孫壽八十一子子珍庠生館於外作思親詩讀之令人增感母歿哀毀盡禮父病劇醫束手珍焚香籲天願減算以益父壽旋獲安後父歿居喪不入寢室葬後上冢焚香香心每自熬人以為孝感珍弟仁厚性敦篤孝友亦如珍兄臨終授子以朱子小學諄囑遵行

陳國鼎號雨汀少負至性家貧苦讀道光己酉舉於鄉丙辰進士分發陝西知縣恂謹如諸生不隨俗員趨附

王逢年號耘溪同治甲子舉人戊辰進士授內閣中書少孤力學孝友兼至授經二十餘年成就多士立身致行必準古人家雖窘自甘淡泊無他營

張曜澤號星槎理問職家居課子母病侍湯藥三年無少倦事諸兄以誠敬周恤親友無德色遇爭論事勸解持平嘗笑不苟壽七十三子凌斗增生浙江補用知府

王運溱號春臺勤儉忠厚視田自給授徒有方嚴取與甘淡泊遇人紛爭力為解釋凡鄉族義舉竭力贊襄人服其公正子兆麟卽選從九

張崧堯號彖仙性穎悟善屬文尤長駢體由廩生中同治丁卯舉人事兩親曲承歡意友愛昆弟怡怡一堂卒年三十

劉丙奎號聚垣九歲解吟咏能作擘窠書年二十冠童軍由廩生詹事府主簿登同治壬戌鄉榜未及赴春闈而卒著有紉蘭齋文集



王運光號曙堂太學生品行端潔勵志讀書孝事父母雍睦一堂自甘淡泊不失讀書本色士林重之

張承寅號繼忍太學生性剛直好施與置義山施貧樸課童蒙每以保身惜字重粟為訓生徒多化之壽七十六

彭又思性剛直喜排解里有周姓因家窘極將妻改適已書婚帖夫婦不忍離又思為捐資全之子立輝附貢生修族譜

建宗祠公事慎勤鄉里信服孫錫辰觀先均庠生

張啟志號維高國學生居鄉善排解務施濟戚某宦粵負債

莫償變已產代還之道光己酉歲饑出已穀倡設減糶捐助

粥賑卒年七十一子新藻新莢新蔚例貢及成均

杜金澤號玉相增貢生國子監典籍銜博識能文才優肆應

族姓聚居丁口極繁以身董率葺宗祠修族譜助賑捐饗城

工學宮凡地方公事無巨細必首為倡助壽八十一

張汝翼號醒初庠生博覽羣書辨晰字義家法井井邑中巨

舉如修學廟助軍饗橋梁寺觀皆力為倡勸凡事關風化耐

勞任怨是非必爭以籌餉敘光祿寺署正

凌紹耀號丙嶽道光己酉下游水災辦賑得力敘布經歷銜

咸豐三年襄辦團防倡捐學塾助修學宮公培驛路見義能

為贈五品封

王雲湘號星垣監生兄弟友愛咸豐初曾文正委辦軍裝湘

出貲監造粵匪過境適父病篤賊過其門人爭趨避湘獨侍

奉在家賊亦未犯其閭種竹栽花極田園之樂



吳紱榮原名炳號麟周道光丙午舉人主講嘉禾珠泉書院以江皖軍功保同知知府銜任江西定南同知殫心治理捐廉課士著有金粟詩文詞集盾餘筆記靖寇日記碧蓮詩舫聯吟待梓

黃鈞派名維鍾天姿穎異膽識過人力學未售投筆從戎由縣丞洊保花翎知府加道銜以勞瘁卒于明起藍翎把總次淦藍翎知縣畱陝補用

湯慶祺號靖安至性過人喜善舉遇溺女者設法拯之構訟者理解之教子嚴而有法詩書外旁及兵法吏治粵匪之亂命于從疆吏治軍旅洎服官常錄先正格言及諸治譜相誠勉晚年築室象山之麓顏曰師向山莊著有漱芳館詩集象

山賦草子柄璣廣東虎門同知聘珍甘肅知府記名道

羅教忠號益卿邑庠生成豐初元髮逆竄省防禦有功以訓導選用嗣鄂撫胡文忠檄司蔡甸權稅積功擢知縣選桃源訓導旋選四川墊江知縣兼權忠州篆調補德陽加運同銜改簽陝西延長令迂道歸省未數月丁母氏艱次年秋以微疾卒於里第忠生平勤慎自持言動有法涖官爲守兼優聽斷明允循聲卓著子五振南太學生覲光四川候補知州振潞候選知州振清振渝均太學生

張幾號庶斯性豪達家貧力學博覽羣書所與交皆一時知名士兼精越人術門外求診者屢常滿著有老大畏不足畏齋詩文集以子鴻舉贈五品封



善化縣志 卷之二十四  
劉可閻號悅軒持躬謹恪處世和平家素窘中年頗臻小阜  
凡恤寡憐貧資助義舉無不力爲訓子有方以子志綬贈四  
品封

胡朝華號錦堂候選從九性誠樸待人忠厚逋負者不責償  
捐田入學培植後起子逢藻號棣園附貢國子監典籍銜讀  
書尚氣節恭敬退讓恂恂儒者捐修學宮及卷局籌款皆與  
力焉

黃友誼號翰卿性篤厚持身以約待人以誠生平以讀書爲  
樂探經研史教育多所成就至老猶手一編不釋壽七十七  
子維申附貢生維午儘先千總

楊 會號禹村歲貢生博通經史精術數文宗先正不屑時

趨家故素封咸豐壬子兵難室產罄洗胞弟然敬以舉人判  
湖州殉難會爲請卹撫孤篤友愛如生前晚以琴書自娛名  
利俱澹卒年六十三

王樹榮號貴華太學生粗識詩書有至性憐族兄弟貧出貲  
佃田給種並爲娶妻延嗣購置基址創建宗祠費五百餘金  
並捐祀田三十畝倡修族譜不惜勞費族有葬伊山者臨沒  
書契與之不責償家僅中貲篤於根本地方義舉亦無所吝  
里黨以爲難

龔應心號寅臣父楚益性嚴急應心百方承順能得其歡侍  
疾衣不解帶父沒遵儒禮不事浮屠哀毀骨立季弟貧爲經  
理生計時周給之弟沒喪葬皆獨任焉



熊太宇性耿直奉母以孝順稱排難解紛直言不諱辦理團務非公事不入公門團境肅清人皆悅服

陳代興性長厚濟困全婚多隱德咸豐三年髮賊竄河西土匪乘風滋擾曾文正訪拏甚嚴代興力排眾論於可原者活十數人

郭時盛性直氣和解難息紛不辭寒暑遇重大事一身肩之不以累人捐修學宮辦理軍餉均與力焉

胡朝陞號進秩少秉至性得父母歡心慷慨好義鄉里推重屈身戶書貧戶積欠墊賠千餘金悉焚單串於庭

張玉恩撫營藍翎守備廉謹尚義清復營產充撫轅巡捕時委辦團防清嚴有法子增鏡郡庠生

楊葆光號顧廬性寬厚嗜古力學著有草廬詩集

劉以畝號綏之少志詩書喜吟詠居鄉投徒敦品立行修祠宇輯家乘一族賴焉

侯開雲號見月國學生賦性慷慨嘗傾囊倡建橋梁置義山胞兄文光無嗣孀嫂羅氏因夫葬祭費用遺業盡售見月備金取贖歸羅並爲立繼完配似續以延

黃友肫號立人從九職品行端方允孚鄉望辦理團練積儲尤徵勞績焉

侯 綬號金印附監生事繼母能得歡心待人謙讓處事公平濟貧救困鄉人稱之

龔應鴻號匯澤庠生性方正事親生養致敬葬祭遵禮兄弟



分多潤寡平居不苟言笑端坐一室如對神明以姪鎮湘貴  
貲贈五品

鄒壽崑號子律幼穎異厚重簡默成丁之年卽完經史楷宗  
鍾王中光緒丙子舉人隨父北上卒於都時年二十四歲士  
林惜之

張先恩號柱卿庠生才識明敏家貧授徒課讀嚴明與人交  
和光可挹遇紛難事委曲詳辨執理不同里鄙推重

彭樹敬國學生幼失恃父性嚴急順志承歡仲兄貧迎養盡  
禮恤諸姪撫遺孤生平篤於義舉兼以醫術濟人卒年七十  
三子齡庠生

王昌隆號雲從幼失怙恃撫於嫂胞兄亦早逝嫂李氏自矢

苦節昌隆事之如母族有不能嫁娶者婚配之貧乏者資助  
不少吝

鄒本溥性敦篤父仕珍老病風痺小便閉極時醫無術溥以  
口承前陰吸之而通後遂以爲常左右就養者三年父臨終  
謂曰爾事我好爾無子當於冥中祈一子爲爾嗣且保爾老  
健服闋生一子取名立應溥年九十後尙能登高山著屐行  
數十里晚年亦病風痺得孫媳馮氏善事之力壽九十七  
黃友齡少讀書以貧輟業善謀生事父母生葬盡禮兄弟至  
老無少猜嫌期功近親貧者視家周恤之量材成全之以姪  
兆昇貲贈振威將軍

皮學道少失怙恃侍大父母奉養竭力葬祭以禮篤念天顯



人無閒言

唐 介國學生孝順端謹父母歿後每至墓所誠敬一如生時年至八旬必履杖而往孺戀不衰

柯 蔚八品銜母病篤潛禱於神刲股和藥以進病遂痊後從軍沒於浙僕含殮見創歸述其事問其妻王氏始悉焉

唐萃高舉人業裳長子祖年八十餘得風痺萃代哺飼之夜不安寢則撫摩抱臥大便急時難於轉側萃以兩手捧承之服勞奉養一出至誠人稱爲順孫

黃紹梅厯居南城外母年七十餘患痿疾左右扶持咸豐二年賊突撲城梅負母走爲賊所困泣求救賊念其孝釋之唐開愚號必明國學生少失怙遵母訓習詩書出外無遠邇

母囑歸雖風雨未敢違謙和公正鄉族稱善人焉

夏聲益性篤家貧在省營生聞母病急歸省病益劇醫藥罔效禱神割股進食之病愈鄉里爲作孝行歌

龔 章號卓齋庠生性肫篤家貧授徒因父多病於遠館雖重聘不往操守清潔卒年七十五

劉厚蒸號蔚堂家貧失怙母陳氏茹檠飲冰蒸服賈爲養每念母劬勞先意承歡於母寢設小榻臥其旁寒暑不間母性喜施恤凡孤貧待助者必給渡口衢路承母志獨力興修母壽九十三子燾循例贈五品封

劉家猷家貧食力母病痿痺艱於舉動家猷裹洗櫛沐事事躬親夜臥牀邊扶持便溺數十年不倦



善仁果志 卷之二十四  
楊祈纁號錦堂性仁恕樂施與飭行謹言尊師重學卓有儒風以軍功敘六品銜壽七十五

黃翊斗從九職性忠厚年荒減糶施棉衣棺木不吝以無疾壽終

謝開棗號東山母患癱瘓侍奉廿餘年不懈伯兄以事株累不令父知傾產營脫捐施家港義山子其毅貴州知縣

龔 梁號國幹善事孀母劉氏兄弟友恭族里有貧困者周恤不倦善長桑術遇貧人施藥以療子孫科名接踵

黃光楷號秋圃幼失怙恃每逢生忌日必設饌泣祀家貧勵志讀書授徒自給喜談因果善醫多活人

周元圃號靜齋性友愛急公好義鄉里稱之

黃昌鵠號晴樓庠生力學植品兼通醫術道光己酉飢民載道瘟疫時行晝夜診視全活多人

吳光克號禮田性渾樸精醫術活人不受謝貧者輒給以藥貲年荒減糶鄉里賴之子文奎孫學純俱例貢曾孫大遴大選入成均

黃友棣號萼樓庠生天性篤厚因母病精研醫術活人無數歿之先三日撰世業詩書無量福家敦孝友有餘歡之句書作楹帖以示子孫

李律鳳號蔚中讀書能文精醫術寄居闔閭閒貧求醫者立往治之酬以錢不受豪貴人不能強之一顧卒老於窮

王恆簡號岳山習儒未售精醫理善喉科遠近求治者無虛



日壽逾八十尙能診脈調方不受謝

鄒式範號蘅齋庠生詩文均有奇氣以軍功保舉訓導精醫術年六十九無疾終

張樹楨號毅夫性嚴正持家勤約精軒岐術施藥濟人道光之季喉症時行治之多所全活卒年七十三孫曾林立

楊章華國學生爲人誠樸通銅人經絡活人甚多輯有醫方秘要傳世

李光大號懋軒性直鯁習儒書兼通醫學得傷寒金匱要義自負長沙後身遇危症探病舉脈靜坐良久出一方調刀圭火齊促服之多奇中鄉里窮乏者必親往診視全活尤多是能以術行仁者

譚序典號徽五從九職績學未遇性剛直慷慨建家廟輯家乘捐祀產皆能踴躍爭先鄉黨有不平事直言排解不少阿曲晚益精長桑術儲藥濟急不少悖壽七十九子家贊增生孝廉方正湖北候補同知家賁由戎行薦擢都司



善化縣志卷之二十四終

善化縣志卷之二十四終







